

Rom

Pol Rom nibi bi kalip köp kali kñiñ rika

Pol Rom nibi bi kalip köp kali kñiñ rika

1 ¹Yad Pol. Krais Jisas wög gi ñeb bi nipe midpin. God yip hag lö, Krais Jisas manö aij ud arep bi ap midpin. God nipe yip udö, God manö aij u ud ajmidin.^a ²Pen manö aij anibu, God hadame nöp bi manö hagep nipe gau kalip hagö, kale God Manö u Manö Uł u kali kñiñ riköm hagla rö nöp ga.^b ³Manö Uł kali kñiñ riköm hagla anibu, kale God Ñi nipe manö u nöp hagla. Ram minöñ ił i lau u, bi ne Depid rikö, rik dam dapil göm, nip yag daula. ⁴Pen nipe ke God, nipe ke uł yabił u, nipe umöm uraka u me, kłö ke yabił anibu niñun niñbun, nipe God Ñi nipe yabił, Bi Kub hon Jisas Krais.

⁵Jisas Krais yip mög niñöm ud aij ga. Jisas Krais hib nipe adö aran, a göm, God bi gau abe yip abe hag löm haga, kale minöñ naböñ gau rigoñ rigoñ nibi bi magöñhalö yabił kalip Jisas manö aij hag ñibe, kale manö aij anibu niñ udöm, hagöp rö nöp göl, a ga.^c ⁶Pen kale Rom nibi bi midpim au, God kalöp u rö nöp Jisas Krais nibi bi nipe ke hag la.

⁷Anib u, kalöp Rom kai, God, nibi bi yad mideilan, a göm ud midmagö yabił löp gau, kalöp köp i kali kñiñ rikabin. Bapi God, Bi Kub Jisas Krais, kalöp ud aij gımil, abad mid aij gilö me, kale agamij mid aij gımim.^d

Pol daun kub Rom arnam, a göm, gasi u niña

⁸Manö nöd hagnig gabin u, kale Jisas Krais niñ udpim u, nibi bi ram minöñ goł adsagö gau magöñhalö aiud anibu niñöm haglö arab. Anib u, yad Jisas Krais nip sabe gem, God nip aij a gabin. ⁹⁻¹⁰Yad God Ñi nipe manö aij u, gasi añi u nöp niñem kłö gem, hag ñi ajem, God nip wög

^a 1:1 Ap 9:15 ^b 1:2 Ro 16:25-26 ^c 1:5 Ap 26:16-18; Gal 2:7-9 ^d 1:7 Nab 6:25-26

gimidin. God nipe niñöb, yad nip sabe gem, pör nöp hib kale hagabin. God nipe adan hiikö, kale midpim au am niñnabin, a gem, nip sabe gabin.^e

¹¹ Jisas manö aij nipe rimnap kalöp hag ñinö, God Ana nipe ana kalöp nan aij ap ñö, ana kalöp aŋ daŋ pidöŋ midaimim, a gem, kale midpim au am niñnam a gem gasi u pör niñabin. ¹² Pen adö anibu nöp wasö. Yad aunabin u, yad Jisas Kraiss niñ udpin rö niñmim, kale ana kalöp aŋ daŋ pidöŋ udmim, Jisas Kraiss nip niñ ud pidöŋ yabił ginabim. Pen anig unbö rö, kale Jisas Kraiss niñ udpim rö niñem, yad u rö nöp ana yad aŋ daŋ pidöŋ udem, Jisas Kraiss nip niñ ud pidöŋ yabił ginabin.

¹³ Añ mam bi. Yad kalöp am niñnam, a gem, gasi u pör niñmidin u pen adan midageia. Amem, Jisas Kraiss manö aij u hag ñinö, kale manö aij u niñmim, hagöp rö nöp niñ udmim, Jisas Kraiss nip niñ udpe, nipe kalöp ud asik yunim, a gi gasi niñbin. Minöŋ naböŋ ke ke gau, nibi bi rimnap aŋ kalip gau ginö rö, am aŋ kalöp au u rö nöp gibnep.^f

¹⁴ Pen Jisas Kraiss yip ud kamiŋ yua u me, yad gasi niñbin yad nan naböŋ midöp. Yad nibi bi gau manö aij nipe u hag ñinam. Grik nibi bi gau abe, Grik nibi bi wasö gau abe, nibi bi kali kliš niñbal gau abe, nibi bi kali kliš niñagpal gau abe, kalip magöŋhalö manö aij nipe u hag ñinam, a gem, gasi u niñbin. ¹⁵ Anib u me, yad kale daun kub Rom midpim gau u rö nöp, am Jisas manö aij u kalöp hag ñinam, a gem, gasi añi u nöp niñabin. ¹⁶ Jisas Kraiss manö aij nipe u God pidöŋ halö hagab u me, nibi bi manö anibu niñ udeinaböl u, manö aij anibu kalip ud asik yunab; Juda nibi bi gau abe, Juda nibi bi wasö gau abe, kalip magöŋhalö ud asik yunab. Anib u, yad Jisas manö aij nipe u gasi niñem, gasi halö nöp midpin.^g ¹⁷ Jisas manö aij u niñun niñbun, God nipe aigöl göm nibi bi nan si nan naij gipal gau kalip nibi bi aij, a ginab. Nibi bi gau kale gi aij gipal u niñöm, God kale nibi bi kamiŋ aij, a gagnab; kale Jisas manö aij u niñ udpal u niñöm, kale nibi bi kamiŋ aij, a ginab. Adö anibu nöp, God Manö kali kliš riköm hagla, “Nibi bi God Manö hagöp rö niñ udnaböl gau, God kalip nibi bi aij, a gö, kale kamiŋ yöl mideinaböl,” a ga.^h

Nibi bi Jisas Kraiss nip niñ udagnaböl gau manö kub niñnaböl

¹⁸ Nibi bi God Manö niñö niñblap u pen nibi bi rimnap God nip gasi niñagöm, gi naij göm, God Manö niñö u paŋu gipal. Anib u me, God nipe kal göm, kalip manö kub hagnig gab. ¹⁹ God nipe aigale Bi rö midöp, nipe ke waiö lö niñbal.ⁱ ²⁰ Nipe hadame dagol gau minöŋ naböŋ gi la ñin u rikö, nipe God kłö halö yabił pör pör midöp u waiö midö niñbal. God nipe nan niñhön niñhön gi la gau nöp niñöm, nipe aigale Bi rö midöp

^e 1:9-10 Ap 19:21; Ro 15:23 ^f 1:13 Ap 19:21 ^g 1:16 Mak 8:38; 1Ko 1:18-24; Ap 13:46

^h 1:17 Ro 3:21-22; Hab 2:4 ⁱ 1:19 Ap 14:15-17; 17:24-28

u niñblap. Niñageinaböl u, nan kale.^j 21 Anib u, God nip niñbal u pen nip aij, a göm, hib nipe u haglö adö aragöp. Gasi hañowañö niñöm, hauñ alöm, sibön göp gau rö midpal.^k 22 Hon nibi bi gasi aij niñmidun, a gipal u pen kale nibi bi hauñ rö midpal.^l 23 God pör midöp u nip hauñ göm, nan yihariñ rimnap udöm, nibi bi rö gi löm, wal yaur rö gi löm, haiño sara rö gi löm, nan anib gau, god hon, a göm, sabe gipal.^m 24 Anig gیلö, God kalip arö gö, kale gasi naj yabiñ niñöm, nibi si bi si göm, nagi naj adö anibu amöm, hañ romañ kale ke gi naj gipal.

25 God Manö niñö u arö göm, manö piral niñ udpal. God nan gi la gau nöp sabe göm, nipe nan gi la gau nöp hib haglö adö aröp. Pen God nan magöñhalö gi la u, hib nipe haglö adö arböp. Hib nipe nöp pör pör nöp hagno adö arañ. Anib unbö rö aij.

26 Kale anig göl gi naj yabiñ geila u me, God kalip arö gö, nan nable yabiñ göp adö u nöp gimidal. Nibi gau, bi kabö göl ud midöl rö arö göm, nibi rimnap aip nagi naj adö rimnap gipal. 27 Bi gau u rö nöp, nibi kabö göl ud midöl rö arö göm, bi ap bi ap nip niñö mab rö inö, bi gau kale ke nöp gi naj yabiñ gipal. Anig göm pen ilön udpal.ⁿ

28 Hainö God manö niñagnabun, a göm, gasi niñla u me, God kalip arö gö, nan naj nan gagep kalip midmagö piñu göp gau nöp gipal. 29 Pen kalip nan naj gep adö u gasi añi u nöp lö, kale naj yabiñ nöp göl göm, nan gau hon nöp midañ, a göm, gasi u niñöl göm, hañowañö gi naj göl göm, gipal. Nibi bi nan aij kale gau yad rö lagöp a göm, gasi naj niñöm, wip alöm, pen pen göm, piral hagöm, gasi naj nöp niñbal. Pen, nöp hagöp yip hagöp, a göm, 30 nibi bi hag juöm, God nip mulu kal niñöm, nibi bi hag pro göm, hanip nöp nibi bi kub, a gi niñlañ, a göm, hib kale u ke dap ranbal. Gasi hain nibö adö rimnap niñun gi naj gun, a göm, gasi kale anibu nöp niñbal. Nime nap manö hagpal u rib jubal. 31 Kale gasi rimid lagöp. Manö ke hag libal adö u hain gagpal. Ni pai amilip apilip kale ke gau midmagö lagpal. Nibi bi rimnap niñlö, mög gagöp. 32 Gipal anibu, God wasö gö ilön kub udep u niñbal u pen kale ke göm aka nibi bi rimnap aip göm, u gi aij gabun, a gipal.

God manö kub hagöm, manö kabö göl nöp ud asiknab

2 1 Pen kale nibi bi rimnap kalip hag jumim hagnabim, “Nibi bi gau niñhön ginig nan si nan naj gipal,” a ginabim u pen kale ke u rö nöp gipim u me, God niñöm kalöp manö kub hageinab u, kale abe manö pen hagnabim rö lagnab.^o 2 Hon niñbun, God nipe manö niñö nöp hagöp. Anib u, nibi bi anig unbö rö ginaböl gau, kalip manö kub hagnab u, manö

^j 1:20 Job 12:7-9; Sam 19:1 ^k 1:21 Ep 4:17-18 ^l 1:22 Jer 10:14 1Ko 1:20

^m 1:23 Dud 4:15-19; Sam 106:20 ⁿ 1:27 Lep 18:22; 20:13; 1Ko 6:9 ^o 2:1 Mad 7:1-2; Jon 8:7

kabö göl nöp hagnab. ³Nibi bi nan si nan naj gipal gau, a gimim, hag junabim u pen kale ke u rö nöp gipim. Anib u, kale gasi nihön niñbim? God hanip manö kub hagagnab a gimim niñbim aka? ⁴God bi aij, kalöp nibi bi pör mög yabiñ niñöm, agamij hain rik damöm, yiñid kal gagöp u niñbe, nipe bi yiħariñ ap rö löp ar? Pen niñim! Nipe agamij hain rik midöp u, yad yiñid kal juageinabin, kale nan si nan naj gipal gau, nihön ginig anig gipun a göm, arö göl, a göm, agamij hain rik midöp.^p ⁵Pen God agamij hain rik midöm yiñid kal gagöp u, kale nan si nan naj gipim u, nihön ginig anig gipun, a gimim, arö gagpim. Kale manö nipe ji niñmim, nan si nan naj gipim gau nöp göl gi midpim. Anib u, God nibi bi ginaböl ginaböl rö niñöm, manö kub hagnab ñin u, kale manö kub yabiñ niñnabim. Ñin anibu, nipe manö kub hagöm, kabö rö nöp hagnab u, waiö niñnaböl. Nan si nan naj gipim u, nipe niñöm kal göm kalöp ilön pen ñinab. ⁶“Nibi bi añi añi ginaböl ginaböl rö niñöm, God kalip u rö nöp añi añi pen ñinab.”^q

⁷Ñin anibu nibi bi an, God hanip mailö aij nipe ñöm, manö aij hagöm, kamiñ pör midep magö u ñinab, a göm, nibi bi rimnap kalip pör pör gi aij gipal gau, God kalip kamiñ pör midep magö u ñinab. ⁸Pen nibi bi an an, nan hañ romañ kale ke nöp gasi niñöm, nagi aij adö anibu ji niñöm, nagi naj adö u arnaböl gau, God kalip niñö mulu yabiñ lugö, kal juöm, ilön kub yabiñ ñinab.^r

⁹Pen Juda nibi bi gau abe, Juda nibi bi wasö gau abe, nagi naj adö u geinaböl u, God kalip hagö, kale magöñhalö uñham midöl göm, gasi milö yabiñ löl göm, gi mideinaböl. ¹⁰Pen Juda nibi bi gau abe, Juda nibi bi wasö gau abe, gi aij geinaböl u, God kalip magöñhalö mailö aij nipe ñöm, manö aij hagöm, ud aij gö, mid aij ginaböl. ¹¹Nihön ginig: God nipe böñ lap aka böñ lap aragnab. Kabö göl nöp niñöm, nibi bi gau kalip ud asik ke ke linab.

¹²Juda nibi bi wasö gau, lo Mosis haga niñagal gau, nan si nan naj geinaböl u, lo manö niñagal u pen kale ram minöñ naj arnaböl. Pen nibi bi lo Mosis haga niñbal gau, nan si nan naj geinaböl u, God lo manö anibu udöm, kalip manö kub hagnab. ¹³Nibi bi lo manö niñmidal gau, God kalip, nibi bi aij yad, a göm hagagnab. Nibi bi lo manö hagöp rö nöp ginaböl gau nöp, God kalip, nibi bi aij yad, a ginab. ¹⁴Juda nibi bi wasö gau lo Mosis haga niñagal. Pen kale gasi kale ke niñöm, lo manö hagöp rö geinaböl u, gasi magö kale ke lo rö midöp.^s ¹⁵Kale anig göl gasi niñöm gipal u me, hon niñjun niñbun, lo manö u añ kale dañ midöp. Ñin rimnap gi damöm, añ kale yañ, “Gi naj gabun,” a göm niñbal. Pen ñin rimnap gi damöm, añ kale yañ, “Gi aij gabun,” a göm niñbal.

^p 2:4 Ep 1:7; 2Pi 3:15 ^q 2:6 Sam 62:12; Pro 24:12; Mad 16:27; 2Ko 5:10 ^r 2:8 2De 1:8
^s 2:14 Ap 10:35

¹⁶Jisas Kraiss manö aij hag ñi ajmidin u hagab, manö kub hagep ñin u, God Jisas Kraiss nip hagö, nibi bi nan si nan najj pi göl gipal gau hag hiik waiö lö, nipe gasi magö kale ke midmagö aŋ kale daŋ nihön nihön hagöp u niŋöm, kalip manö kub hagnab.

**God nipe lo manö hanip ña u me, hon Juda kai
nibi bi nipe ke yabił midpun, a gila**

¹⁷Pen kale Juda nibi bi gau, hib kale ke dap ranöl gi haggim, “God nipe lo manö hanip ña u me, nibi bi nipe ke yabił midpun. ¹⁸Hon lo manö niŋbun u me, nagi adö anibu aij, nagi adö anibu najj, a gi gasi niŋjun, God nip aij göp adö u nöp gipun,” a gipim. ¹⁹Pen manö adö ap haggim, “Nibi bi niŋagpal gau kalip hag ñi aij gun, nibi bi amgö we gö sibön göp rö midpal gau kalip hag ñi aij gun, ²⁰nibi bi lo manö niŋagpal gau kalip hag ñi aij gun, ñi pai pro gau kalip hag ñi aij gun gipun,” a gipim. Haggim anibu haggim, “God nipe lo manö hanip ña u me, gasi aij magöŋhalö abe, gasi niŋö magöŋhalö abe hadö niŋbun,” a gipim.^t

²¹Kale lo manö u niŋmim, nibi bi gau kalip hag ñibim u pen manö nibi bi gau hag ñibim rö kale ke gaggim. Nibi bi rimnap kalip haggim, “Nan si udagmim,” a gipim u pen kale ke nan si udpim aka?^u ²²Nibi bi rimnap kalip haggim, “Nibi si bi si gaggim,” a gipim u pen kale ke aniŋ gipim aka? Nibi bi rimnap kalip haggim, “Nan hałöwałö gau God rö sabe gaggim,” a gipim u pen ram sabe gipal miŋan anib gau ammim, nan dap libal gau rimnap si udpim aka?

²³Hib kale u ke dap ran limim haggim, “God lo u hanip Juda nibi bi ña,” a gipim u pen manö nipe u rib jubim rö, hib nipe u rö nöp hag jubim aka? ²⁴Gi najj gipim anibu, bi ap nöd God Manö kali kłiñ riköm haga rö nöp gipim. Nipe haga,

“Kale Juda nibi bi, God lo manö niŋbun a gipim u
pen kale ke mid aij gaggim rö,
Juda nibi bi wasö gau,
God nip hag jubal,” a g.^v

²⁵Kale Juda kai, God nibi bi nipe midaiun, a gimim, ñi gau yag dapim, pör pör waŋ hañ rib gi dö gipim. Pen lo manö nipe u rib jumim, ke niŋnabim rö ginabim u, nibi bi yiħariŋ ñi waŋ hañ rib gi dö gagal rö u midnabim. ²⁶Anib unbö rö, nibi bi au Juda wasö, ñi hañ rib gi dö gagal gau, lo manö hagöp rö geinaböl u, God kalip nibi bi ñi hañ rib gi dö gipal u rö niŋnab.^w

²⁷Juda nibi bi wasö, ñi hañ rib gi dö gagal gau, lo manö hagöp rö gipal. Pen kale Juda kai, Mosis lo kali kłiñ rika u udmim, ñi hañ rib gi dö gipim u pen lo manö rib jubim u me, kalöp manö kub mideinab.

^t 2:20 2Di 3:5 ^u 2:21 Mad 23:3-4 ^v 2:24 Ais 52:5 ^w 2:26 Gal 5:6

²⁸Hon nibi bi rimnap hagnabun, nibi bi ñi hañ rib gi dö gipal gau nöp Juda nibi bi kabö göl, a gipun u pen u manö niñö hagagpun. Nibi bi an an kale Juda nibi bi kabö göl midpal? Hañ romanñ nöp niñun, Juda nibi bi aka Juda nibi bi wasö, gun, hagagnabun. ²⁹Juda nibi bi kabö göl gau, an kale dañ niñun hagnabun, bi anibi nipe Juda nibö kabö göl, a ginabun. Midmagö nipe u hañ rib gi dö gi midöp niñnabun u, bi u bi Juda kabö göl, nibi u nibi Juda kabö göl, a ginabun. Lo Mosis kali kññ rika u gö, midmagö kale au hañ rib gi dö gagep; God Ana nipe nöp midmagö kale au hañ rib gi dö ginab. Nibi bi midmagö kale unbö rö midöp gau, nibi bi gau kalip niñlö hib midagöp, pen God niñö hib midöp.^x

God hagab rö nöp gab

3 ¹Anig hagabin u, bi ap hagnab, “Juda nibi bi wasö, hañ rib gi dö gagal rö midaibnop aij giböp,” a ginab u pen adö anibu hagagin. ²Juda nibi bi midpun u aij yabiñ midpun. Manö yad ke nibi bi rimnap kalip hag ñöl, a göm, God hanip Juda nibi bi nöp manö aij nipe ña. ³Pen Juda nibi bi rimnap nihi bi manö kñö hagla rö gagla. Anig gila u, God manö kñö kalip haga u arö ginab aka? ⁴Wasö yabiñ, arö gagnab. Nibi bi gau magöñhalö ñin rimnap piral hagnaböl, pen God nipe bi niñö yabiñ hagöm, hagab rö nöp ginab. Manö anibu rö God Manö u kali kññ riköm hagla,

“God, ne manö kabö göl nöp hagpan u,
nöp manö rimnap pen hagöl rö lagöp.
Nöp manö kub hageinaböl u,
manö il ap midageinab,” a ga.^y

⁵“Hon pör pör gi naj ginabun u, nibi bi rimnap niñöm, God pör pör gi aij göp u waiö niñnaböl. Anib u, God hanip kal göm manö kub hagnig gab u aij gagöp,” a ginabun aka? (Pen manö anibu, nibi bi niñöm hagnal rö nöp hagabin.) ⁶Wasö yabiñ! God nibi bi magöñhalö manö kub hagnab u, böñ lap aka böñ lap aragnab; kabö göl adö u nöp hagnab.

⁷Pen kale rimnap hagnabim, “Hon pör pör piral adö rimnap ginabun u, nibi bi rimnap niñöm, God pör pör niñö nöp hagöp u waiö niñöm, Bi mailö halö yabiñ midöp, a göm, hib nipe haglö adö arnab. Anib u, niñön ginig God hanip nibi bi nan si nan naj gep, a göm, manö kub hagöm, ilön kub ñinab?” ö ginabim. ⁸Manö piral anibu rö hagnim hagnabim, “Nan si nan naj u nöp gino gino, God hanip mög yabiñ niñöm, nan si nan naj ke ke iru yabiñ ginabun anibu niñöm arö ginab u, nibi bi gau niñöm, nipe bi aij unbö ke a göm hib nipe haglö adö arnab,” a ginabim. Pen nibi bi rimnap yip ke hag juöl gi, Pol manö anibu rö hagöp, a gipal. Manö anibu rö yad hagagin! Piral hagnal rö, God niñö, kalip manö kub hagöm, pen ilön kub ñinab.

^x 2:29 Dud 30:6; Kol 2:11 ^y 3:4 Sam 51:4

Nibi bi aij ap midagpun

⁹Anib u, nihön hagin? God niñö, hon Juda nibi bi gau mid aij gipun; Juda nibi bi wasö gau mid aij gagpal, a gun aka? Wasö! Midö nöp me haggin rö, hon nibi bi magöñhalö, Juda nibi bi gau abe, Juda nibi bi wasö gau abe, nan si nan naj nagí adö anibu hanip ktö gi lip gi ud arniñ gab.^z

¹⁰Manö anibu rö, God Manö u kali klin riköm hagla,
“Nibi bi pör gi aij ginaböl rö rimnap midagpal.^a

¹¹Nibi bi, nagí adö anibu aij,
nagí adö anibu naj, a göm niñbal gau rimnap midagpal.
Nibi bi, ‘God lau adö arun,
nip aip midaiun,’ a gi niñbal gau rimnap midagpal.

¹²Nibi bi gau magöñhalö God nip arö göm,
nibi bi naj rö midöm,
nan si nan naj nöp gipal.
Kale magöñhalö unbö rö nöp gipal.

¹³⁻¹⁴Aḷab kale u ado malo göm,
pör piral yabiḷ nöp haggpal.
Rugu miñgan kale u, wip umö paḷu gi aij gaglö,
haññ naj auöp u rö midöp.
Nibi bi rimnap kalip niñlö mulu lugö, hag juöm,
manö naj haggpal u, re naj hauaḷ rö midpal.^b

¹⁵Kal naj yabiḷ juöm,
nibi bi gau kalip ilön ñun,
al pak lun, a göm,
gasi u nöp niñöm,^c

¹⁶nibi bi gau kalip pör gi naj gilö,
gasi iru yabiḷ nöp niñbal.

¹⁷Nibi bi gau aip midöm,
agamij mid aij göl rö lagöp.

¹⁸God bi kub niñ midöp, a göm,
piññ gaggpal,” a gila.^d

¹⁹God lo manö anibu hanip Juda nibi bi nöp ña u me, manö anibu magöñhalö hanip Juda nibi bi hagab. Anib u, God manö kub hagnab ñin u, nibi bi ram minöñ gau gau magöñhalö manö pen ap hagöl rö lagnab; kale magöñhalö manö mideinab. ²⁰Anib u, bi ap lo manö hagöp rö geinab u, God bi anibu nip, bi aij yad, a gagnab. Pen God lo hagöp rö niñun, hon nan si nan naj gipun, a gun niñnabun.^e

^z 3:9 Ro 1:18–2:24; 3:23 ^a 3:10 Sam 14:1-3; 53:1-3 ^b 3:13-14 Sam 5:9; 10:7; 140:3

^c 3:15 Ais 59:7-8 ^d 3:18 Sam 36:1 ^e 3:20 Sam 143:2; Ro 7:7; Gal 2:16

**Nibi bi Kraiŋ nip niŋ udpal gau nöp, kalip nibi
bi asiŋ midagöp aij yad, a ginab**

21-22 Anibu, pen miñi, Mosis abe, bi God manö hagep bi gau abe, ginab a göm, kali kliñ riköm hagla rö, Jisas Kraiŋ hanip a göm uma u me, nip niŋ udno, God hanip hagnab, “Kale nibi bi aij yad,” a ginab. Pen hon Juda nibi bi gau abe, Juda nibi bi wasö gau abe, lo adö u nöp niŋjun gino, anig hagagnab.^f

23 Hon nibi bi magöŋhalö nan si nan najiŋ gipun rö, God mailö magö aij nipe ñöb udun rö lagöp u pen 24 God hanip mög niŋöm, Kraiŋ Jisas yuö apöm hanip rau adog uda u me, God hanip nibi bi aij yad a ginab.^g

25 Yad aigöl gem, nibi bi nan si nan najiŋ gipal gau kalip nibi bi aij yad, a ginabin u niŋöl, a göm, God nipe Kraiŋ Jisas nip nan sabe gep rö minöŋ naböŋ iŋ i hag yua. God nipe nibi bi nan si nan najiŋ nöd gila gau, manö kub hagöm, kal juöm, ilön pen ñöm, böŋ nöp al pak liböp u pen nipe agamij hain rik midöm, anig gaga. Pen uri Kraiŋ Jisas nipe apöm, nibi bi nan si nan najiŋ gipal gau magöŋhalö hañ romaŋ nipe ke udöm ilön kub udöm uma. Anib u me, nibi bi an an, hagape nipe nan si nan najiŋ yad hik gi yuöp, a göm, Jisas niŋ udeinaböl gau, God kalip niŋöm kal juöm ilön pen ap ñagnab. 26 Yad aigöl gem, nibi bi nan si nan najiŋ gipal gau kalip nibi bi aij yad, a ginabin u niŋöl, a göm, God nipe anig ga. Manö kub hagem, nan si nan najiŋ gipal rö pen ilön u rö nöp ñinabin, a ga u me, nipe haga rö nöp göm, Kraiŋ Jisas nip nan sabe gep rö hag yuö, nibi bi nip niŋ udnaböl gau kalip nibi bi aij yad a ginab.

27 Anib u, lo adö u gino, God hanip nibi bi aij yad a göm udö, nibi bi nipe midpun, a gun, hib hon ke hagno adö arnim rö lagöp. Jisas hanip a göm uma manö aij u niŋ udun me, God nibi bi nipe midpun. 28 Anib u, nibi bi gau lo manö hagöp rö gipal, a göm, God kalip nibi bi aij yad a gagnab. Nibi bi Kraiŋ Jisas ga manö aij u niŋ udpal, a göm me, God kalip nibi bi aij yad a ginab.

29 God nipe hon Juda nibi bi, God hon nöp wasö; nipe Juda nibi bi wasö gau God kale abe midöp.^h 30 Nihön ginig: God nipe añi u me, nibi bi ñi hañ rib gi dö gipal gau abe, nibi bi rib gi dö gagpal gau abe, kale adan añi u nöp arlö, God kalip nibi bi aij yad a ginab. Anib u, kale magöŋhalö Kraiŋ Jisas ga manö aij anibu nöp niŋ udöl.ⁱ

31 Pen hon Jisas manö aij u niŋ udno, God hanip nibi bi aij yad a ginab, a gipin u, lo manö gau arö ginabun a gem hagagabin, wasö. Nibi bi Jisas manö aij u niŋ udnaböl gau, kale manö aij anibu hagöp rö nöp gilö, lo manö u am pidöŋ ginab.^j

^f 3:21-22 Gal 2:16 ^g 3:24 Ro 5:1 ^h 3:29 Ro 10:12 ⁱ 3:30 Dud 6:4; Gal 3:20

^j 3:31 Mad 5:17

God Ebrahim nip bi aij yad a ga

4 ¹Hon Juda nibi bi, bac itaŋ hon it göm rikö, rik amil apil göm, riklö midpun gau me, bi ne Ebrahim. Pen God Ebrahim nip uda u, aige göm Ebrahim udaŋ ²Ebrahim nipe ke nan aij ap gö, God ne bi aij yad, a giböp, Ebrahim bi gau hagöm “Yad bi aij,” a giböp. Pen God niŋjöb Ebrahim hib nipe ke dap raneb it ap midageia. ³Pen ai ginig Ebrahim hib nipe ke dap ranagböp? God Manö hagab, “Ebrahim nipe God manö haga u niŋ uda u me, God nip ‘Ne bi aij yad,’ a ga.”^k

⁴Bi ap wög göm pe udöm, mani anibi yihariŋ udpin a gagnab; wög gainö pen u mani i udpin a ginab.

⁵Pen nibi bi, hon God nip klö hon ke wög geinabun, nipe hanip nibi bi aij yad a ginab, a gi gasi niŋnaböl gau, God kalip nibi bi aij yad a gagnab. Pen nibi bi, nan si nan naij gipun u pen God nan si nan naij gipun anibu yihariŋ arö göm, hanip nibi bi kamiŋ aij yad a ginab niŋbal gau, kalip nibi bi aij yad a ginab.

⁶Manö hagabin i rö, Depid u rö nöp hadame nöp God Manö u kali kliŋ riköm, nibi bi nan aij ap gagnaböl pen God kalip nibi bi aij yad a ginab gau niŋni linaböl, a ga. Nipe haga,

⁷“Nibi bi nan si nan naij gipal gau,
God nan si nan naij kale niŋjöm arö ginab rö,
aij gö niŋöl gi mideinaböl.

Nibi bi nan si nan naij gipal gau,
God nan si nan naij kale manö kub hagagnab rö,
miŋ miŋ göl gi mideinaböl.

⁸Nibi bi nan si nan naij gipal gau,
Bi Kub nan si nan naij kale tik gi yunab rö,
niŋni löl gi mideinaböl,” a ga.^l

⁹Depid niŋni lep magö haga u, nibi bi ni haŋ rib gi dö gipal gau nöp manö u udnaböl? Wasö yabi! Nibi bi ni haŋ rib gi dö gagpal gau abe udnaböl. God Manö kali kliŋ riköm hagla adiŋ anibu uri nöp hagajin: “Ebrahim nipe God manö haga u niŋ uda u me, God nip, ‘Ne bi aij yad,’ a ga.”

¹⁰Bac itaŋ hon Ebrahim, haŋ rib gi dö gaga niŋ u, God manö haga u niŋ udö, God nip, “Ne bi aij yad,” a ga. ¹¹“Ebrahim manö yad niŋ uda u me, yad, ‘Ne bi aij yad,’ a gipin u, nibi bi gau niŋlaŋ,” a göm, hainö God hagö, Ebrahim haŋ rib gi dö ga. God anig ga u niŋbun. Anib u, nibi bi ni haŋ rib gi dö gagöm, God Manö niŋ udlö, kalip, “Nibi bi aij yad,” a ginab nibi bi gau, Ebrahim bac itaŋ kale midöp.^m

¹²Pen nibi bi ni haŋ rib gi dö gipal pen, Ebrahim haŋ rib gi dö gaga niŋ u, God manö nipe niŋ udmidöp rö, u rö nöp niŋ udnaböl nibi bi gau abe, Ebrahim bac itaŋ kale u rö nöp midöp.

^k 4:3 Jen 15:6; Gal 3:6 ^l 4:7-8 Sam 32:1-2 ^m 4:11 Jen 17:10-11

¹³Pen Ebrahim lo adö gau niñöm gö, God niþ, “Ne bi aij yad,” a göm udaga. Ebrahim nipe God manö haga u niñ uda u me, God niþ, “Ne bi aij yad,” a göm, manö klö niñö hagöm Ebrahim abe ñi pai nipe anib gau abe kalip haga, “Kale ram minöñ iþ i gau gau magöñhalö udnabim,” a ga.”

¹⁴⁻¹⁵God manö klö niñö haga u, nibi bi lo adö u niñöm ginaböl gau hagböþ, God manö klö niñö haga anibu nan yihariñ rö liböp. Nihön ginig: nibi bi lo adö u hain göm, God nibi bi nipe mideinabun a göm niñbal gau, kale magöñhalö lo manö u rib junaböl niñöm God kal juöm, manö kub hagöm, pen ilön ñinab. God manö klö niñö haga u, nibi bi lo adö u niñöm ginaböl gau hagböþ, God manö haga niñ udpal u nan yihariñ rö liböp. Ai ginig: nibi bi God manö haga niñ udnaböl gau niñ aij gagöm, dui ginaböl. God manö klö niñö Ebrahim niþ haga u udagnaböl.^o

¹⁶Anib u, hon niñbun, God ginabin a göm, manö klö niñö hag la anibu, nibi bi God manö haga niñ udnaböl gau nöþ kalip haga. Anib u, God gasi nipe ke nibi bi mög niñöm, yihariñ ud aij ginab u me, Ebrahim ñi pai nipe gau magöñhalö God manö klö niñö haga u rö udnaböl. Nibi bi kalip lo manö ña gau abe, nibi bi Ebrahim rö hañ rib gi dö gagöm God manö niñ uda rö, niñ udpal gau abe, kale magöñhalö manö klö niñö haga u nöþ udnaböl. Ebrahim nipe bac iñañ hon magöñhalö midöp me u.^p

¹⁷God Manö u kali kññ riköm hagla, “God Ebrahim niþ haga, ‘Yad ginö, nibi bi iþ ke ke iru nöþ midpal gau, nöþ bac iñañ hon, a ginaböl,’ a ga,” a gila. Anib u, God amgö ilö adö nipe u, hon nibi bi iþ ke ke gau nibö niþ niñ udpun gau magöñhalö bac iñañ Ebrahim ñi pai nipe yabiþ midpun. God nipe nibi bi umbal gau gö, kale urakpal. God nipe nöþ gö, nan nöð midagmidöp u miñi waielöp.^q

Ebrahim God niþ niñ uda rö nöþ gun

¹⁸Pen Ebrahim miþep yabiþ löm, ñi pai riknim rö lagö, God niþ haga, “Ne, iþ gimön, nibi bi ñi pai ne hainö mideinaböl gau, iþ ke ke iru yabiþ mideinabim,” a ga. Anig hagö Ebrahim, God manö niñö hagöp, a göm, gasi halö midöm me, haga rö nöþ me, nibi bi ñi pai nipe iþ ke ke iru yabiþ nöþ midpal.^r

¹⁹Pen Ebrahim niña, hañ romañ kalpe ber miñau bir bir gi miñau luga. Ebrahim mi nipe söñ ñin juöl unbö mamid lañ (100) ara u me, ñi pai rikep rö laga. Nibin nipe Sera u rö nöþ miþep yabiþ la, ñi pai rikep rö laga. Pen nipe God manö niþ haga u niñ ud pidöñ gi damöm, gasi halö mideia.^s ²⁰⁻²¹God nipe Ebrahim niþ manö klö niñö haga u, Ebrahim gasi miñöp niñaga; nipe böñ nöþ niñ uda. God Bi pidöñ halö, manö klö niñö haga rö nöþ ginab, a göm, God manö haga u niñ udöl gi mideia rö, gasi

ⁿ 4:13 Jen 17:4-6; 22:17-18; Gal 3:29 ^o 4:14-15 Ro 3:20; 5:13; Gal 3:18 ^p 4:16 Gal 3:7

^q 4:17 Jen 17:5 ^r 4:18 Jen 15:5 ^s 4:19 Jen 17:17

magö nipe u pidöŋ rimnap halö udöm, nipe God manö haga u ud pidöŋ yabił göm, God hib nipe u hagö adö ara. ²²Ebrahim ga anibu, God Manö u kali kliñ riköm hagla, “Ebrahim nipe God manö haga u niŋ uda u me, God nip, ‘Ne bi aij yad,’ a ga,” a gila. ²³“God nip, ‘Ne bi aij yad,’ a ga,” manö kali kliñ rikla anibu, Ebrahim nip nöp kali kliñ rikagla. ²⁴Hanip abe, niŋöl a göm, kali kliñ rikla. God nipe gö, Bi Kub hon Jisas uraka anibu niŋ udpun u me, nipe hanip abe nibi bi aij yad a ginab. ²⁵Pen nan si nan naj gun asiŋ midaino rö, God hanip mög niŋöm, Ni nipe Jisas Krais nip yuö apöm, “Kale nan si nan naj gipal anibu God niŋöm arö ginim,” a göm, uma. Pen Jisas umö, God gö, kauyaŋ uraka rö, asiŋ kub gac hanip uł ga anibu kamiŋ linim rö lõp.”

God nip niŋ udeinabun u, hanip nibi bi asi masi midagöp a ginab

5 ¹⁻²Pen God hanip mög niŋöm ga anibu niŋ udno u me, hanip nibi bi asi masi midagöp a göm, uda. Anib u, Bi Kub hon Jisas Krais nipe gö, hon God aip jim ñöl midun, agamij mid aij gipun. Pen ram minöŋ hon hag lõp u amun, God mailö aij nipe u niŋun, nip aip mideinabun a gun, aij gö niŋöl gi midpun.

³ Miŋör auö, ułham midpun u, miñ miñ göl gi midpun. Nihön ginig: miŋör auö, ułham mideinabun u, hon kłö gun, Jisas Krais cig aij gun, arö gagnabun. ⁴ Hon kłö gun, Jisas Krais cig aij gun, gi dam dam, hon nibi bi gasi magö pidöŋ halö mideinabun. Pen gasi magö pidöŋ halö mideinabun u, hon gasi halö mideinabun. ⁵ Pen anig göl gasi halö mideinabun u, yihariŋ midageinabun. Nihön ginig: God nipe Ana Uł u hanip ñöm hanip midmagö yabił libil.

⁶ Pen hon nibi bi minöŋ naböŋ adö it i midpun gau, nan si nan naj gi damun gac halö midaino, God aip jim ñöl midep rö laga. Hon adan arun ap midageia. Pen God nipe hag la ñin u nöp, Krais hanip nibi bi naj nan a göm uma. ⁷ Pör nibi bi rimnap, bi aij ap nip niŋöm, “Yad nip nan a gem umnö, nipe kamiŋ araŋ,” a göm umagnaböl. Pen ñin añi añi rimnap bi ap bi aij yabił ap rö niŋöm, “Yad nip nan a gem umnö, nipe kamiŋ araŋ,” a göm umnab aka niŋagpun. ⁸ Pen hon nan si nan naj gi midaiun ñin anibu nöp, Krais hanip nan a göm uma. Anib u, hon niŋbun, God hanip midmagö yabił lõp.”

⁹ Krais nipe hanip a gi umöm, hagape nipe lugö, God hanip nibi bi aij yad a ga. Anib u me, hon niŋbun, God kal ju manö kub hagnab ñin u, Krais nipe hanip ud kamiŋ yunab. ^x ¹⁰ God kołmał nipe midaino ñin u me, Ni nipe umöm, hanip Nap aip jim ña. Uri Nap aip jim ñöl midpun u me, Ni nipe uraköm kamiŋ midöp u, hanip niŋö nöp ud kamiŋ yunab! ¹¹ Pen

[†] 4:22 Jen 15:6 [‡] 4:25 Ais 53:4-5 [¶] 5:3 Jem 1:2-3; 1Pi 1:5-7 ^{*} 5:8 Jon 3:16; 1Jn 4:10

^x 5:9 Ro 1:18; 2:5

anibu nöp wasö. Hon God aip jim ñöl midpun rö, Bi Kub hon Jisas Kraiis nipe nöp gö, God aip jim ñöl midpun, a gun, hib kale apil mihau dap ranöl gun, aij a gö niñöl gi midpun.

Adam yam nipe umbal pen Jisas yam nipe kamiñ pör midep udpal

¹²Pen nan si nan najj göl umeb il u, Adam nöp il göm gö me, asiñ nipe anibu nibi bi rik lep nipe gau magöñhalö umbal. Nihön ginig: God niñö, Adam ga anibu, hon nibi bi rik lep nipe gau magöñhalö anig gino. Ñin anibu hanip yag dauagla u pen hon aip gino.^y

¹³God Mosis nip lo manö ña adö u, nan si nan najj gep gasi u minöñ naböñ adö il i nöd mideia. Pen lo midageia ñin u, God nan si nan najj gila u niñöm, hainö pen ñinaböl, a göm, gasi niñ midageia.^z ¹⁴Pen Adam il göm gi najj gö, asiñ nipe anibu nibi bi gau kalip ul gö, magöñhalö um dap dap, Mosis lo manö hag ña ñin u aua. Adam God manö nip haga u rib jua rö, rimnap rib juagla u pen Adam ga rö magöñhalö umla. Adam nipe Bi hainö aunab Bi u rö.

¹⁵Adam gi najj ga u ke; Jisas Kraiis nan aij ña u ke. Adam nan si nan najj gö, nibi bi magöñhalö umbal. Pen Jisas Kraiis nibi bi mög niñöm uma rö, God nibi bi gau magöñhalö mög yabiñ niñöm, ud aij göm, nan aij yabiñ ña.

¹⁶Bi añi anibu nan si nan najj ga u ke; God nan aij ña u ke. Adam nan si nan najj añi anibu ga u, God niñöm manö kub hagöm, ne umnabön a ga. Pen Adam ñi pai nipe nan si nan najj gi dam dam, Jisas Kraiis nan aij yihariñ nö, God, “Nibi bi gau magöñhalö pör pör kamiñ midaiöl rö löp,” a ga.

¹⁷Nöd bi añi ap nan si nan najj gö, asiñ klö najj yabiñ anibu hanip magöñhalö ul ga. Pen hainö, anig adö anib unbö rö wasö, God nibi bi mög yabiñ niñöm ud aij yabiñ gö, nibi bi asiñ midagöp a ginab gau, bi añi Jisas Kraiis gö, kale kamiñ midöm nipe aip aij gö niñöl gi mideinaböl.

¹⁸Adam nan si nan najj magö añi ap nöp gö, asiñ anibu nibi bi magöñhalö ul gö, God manö kub hagöm, “Nibi bi magöñhalö umnaböl,” a ga. Pen Jisas Kraiis ñin añi ap nöp nan aij yabiñ gö, God nibi bi magöñhalö kalip nibi bi aij yad a göm, kamiñ midep magö u ñinim rö löp.^a ¹⁹Bi añi ap God manö haga u rib jua rö, God niñö, hon nibi bi magöñhalö nan si nan najj gino. Ñin anibu hanip yag dauagla u pen hon aip gino. Anib unbö rö nöp, bi añi ap God manö haga rö niñöm umö, God nibi bi magöñhalö kalip nibi bi yad a ginim rö löp.^b

²⁰Nibi bi nöd nan si nan najj gi midmidal; God nipe lo manö hainö ña. God lo manö ña u, nibi bi, lo manö rib juun nan si nan najj gipun u niñöl, a göm, lo manö ña. Anib u, nan si nan najj gila gau iru yabiñ nöp gilö ara.

^y 5:12 Jen 3:6; Ro 6:23 ^z 5:13 Ro 4:15 ^a 5:18 1Ko 15:22 ^b 5:19 Ais 53:11

Pen God nibi bi nan si nan najj gila gau kalip mög yabił niñöm, ud aij yabił ga.

²¹Anið u, nan si nan najj asiñ anibu klö yabił göm, nibi bi magöñhalö uł gö, wip umbal rö mideila. Pen God aniğ göl nibi bi gau kalip mög yabił niñöm, ud aij yabił göm, nibi bi aij yad a göm, kamiñ pör midep anibu ñinab. Bi Kub hon Jisas Kraiss nipe gi aij ga u me, God aniğ ginab.^c

**Jisas aip umun um hauł gino a gun, nan si
nan najj gep gasi adö u niñagun**

6 ¹God hanip mög niñöb aniðu, nibi bi rimnap hagnaböl, “Nan si nan najj halöwałö göl gi midno midno, God hanip nöð niñöm ud aij göp rö wasö, hainö hanip mög yabił niñöm ud aij yabił ginab,” a ginaböl.

²Pen manö piral aniğ rö hagagun! Hon nan si nan najj gep nagi adö u, hon hadö umno. Anið u, midmagö hon piłu gö, nan si nan najj gun rö lagöp. ³Kale niñbim, hon nibi bi Kraiss Jisas aip jim ñöl midaiun a gun ñig pakno gau, “Niipe uma rö jim ñöl umbun,” a gun, ñig pakno.^d ⁴Hon ñig pakno u, Kraiss Jisas aip wip rigöl migan lugun umno rö la. Nihön ginig: Kraiss nipe umö, kabö migan u rigöl gila pen Nap klö ke yabił nipe u gö, uraköm kamiñ midöp rö, hon unbö rö wip rigöl migan rö midpun u urakun, kamiñ hain nibö adö u mideinabun.^e

⁵Kraiss aip jim ñöl umno u me, nipe kauyañ uraköm kamiñ midöp rö, hainö hon u rö nöp urakun kamiñ mideinabun. ⁶God nipe gasi niña, nan si nan najj gep nagi u böñ nöp rib gi dö gö, hainö nibi bi gau kalip nagi wög gep bi rö, adan najj u ud łip gi dam aragnim, a gi gasi niña. Anið u me, nagi adö najj gimidun u, Kraiss aip mab ba lañ al pak lilö uma.^f ⁷Pen nihön, nibi bi um hauł gipal gau, nan si nan najj gep magö u midmagö kale piłu gö göl rö lagöp.

⁸Hon niñbun, Kraiss aip umno u me, nipe aip kamiñ mideinabun. ⁹Hon niñbun, Nap nipe gö Kraiss uraka rö, nipe kauyañ umagnab. Uri umeb magö u Kraiss nip nan ap ginim rö lagöp. ¹⁰Kraiss nipe ñin añi ap nöp uma u pen nan si nan najj gep pidöñ u böñ nöp hir göp. Kraiss kauyañ uraköm, am God aip midpil.

¹¹Anið u me, Kraiss Jisas aip uł gun, nan si nan najj gep adö u um hauł gun, urak God aip kamiñ midpun, a gimim niñmim.^g ¹²Nan si nan najj gep magö u, kalöp adik łip gi dam, bi nagi wög gep rö mo gau midmim, nan si nan najj ginabim, a ginab. Pen kale wihö gimim.^h ¹³Pen gasi najj kale u, hañ romañ ñin ma kalöp adiñ ap, nan si nan najj ginim, a göm, łip gi gainim rö, kale hañ romañ kale adiñ adiñ gau magöñhalö böñ nöp wihö gimim. Jisas aip umun urakpun u me, gasi midmagö rimid hon

^c 5:21 Ro 6:23 ^d 6:3 Gal 3:27 ^e 6:4 Kol 2:12 ^f 6:6 Gal 5:24 ^g 6:11 2Ko 5:15; Gal 2:19

^h 6:12 Jen 4:7

God n̄ip ñun, hañ roman̄ ad̄iḡ gau God n̄ip ñun, nipe hagöp rö nöp gun, a gimim niḡmim.ⁱ

¹⁴Nöd lo manö adö u niḡun gun, a gi gasi u niḡbe, nan si nan najj gep gasi u nöp lö, aniḡ gimimidim. Pen miñi adö aniḡbu rö midagpim. God kalöp möḡ niḡöm udö, Kraiḡ nibi bi nipe midpim u, n̄ip cig gimim, nan si nan najj gau arö ḡinabim.^j

Nagi asiḡ midagöp aij adö u nöp arun

¹⁵Pen God lo manö adö u gino, God niḡöm hanip udagnab; nipe ke hanip möḡ niḡöm, Kraiḡ n̄ip yuö apöm, hanip a göm uma rö, udnab. Aniḡ u, nan si nan najj nöp gi midaiun aka? Wasö yabiḡ! Aniḡ gagun. ¹⁶Kale niḡbim, kale bi kub ap n̄ip, hon bi nagi wög gep ne midun, wög niḡhön hagnabön ḡinabun, a ḡeinabim u, kale bi kub aniḡbu mo nipe gau midpim. Kale nan si nan najj gep n̄ip nagi wög gep bi rö mideinabim u, nan si nan najj gep mo gau midmim umnabim. Pen kale God manö hagöp nagi wög gep bi rö mideinabim u, God manö hagöp mo gau midpe, nipe kalöp nibi bi aij yad a ḡinab.^k

¹⁷Nöd kalöp nan si nan najj gep gasi u nöp lö, bi nagi wög gep rö midmim, adö aniḡbu nöp gimimidim. Pen hainö, Jisas manö aij u niḡmim, böḡ nöp udpim. Aniḡ ḡipim u, yad God n̄ip aij a ḡabin. ¹⁸God nipe gö, kale nan si nan najj mo gau midmim, yöñ udmim, God nagi wög gep nibi bi rö midmim, nipe hagöp rö gi aij ḡipim. ¹⁹Pen kale ke klö midagpim rö, manö hagnig ḡabin i, yad waiö nöp hagnö niḡ aij ḡöl, a gem, waiö nöp hagnabin.

Nöd kale gasi najj yabiḡ niḡmim, nagi wög gep nibi bi rö midmim, hañ roman̄ ñin ma kale gau nan si nan najj yabiḡ gi dammim, gi najj yabiḡ nöp gimimidim. Pen miñi gasi aij yabiḡ niḡmim, nagi wög gep bi rö midmim, hañ roman̄ ñin ma kale gau God manö hagöp rö nöp gi dammim, kamiḡ aij nöp mideinabim. ²⁰Nöd nan si nan najj gep nagi wög gep nibi bi rö midmidim u, God manö hagöp adö u kalöp abadö, mo nipe gau midagmidim. ²¹Pen nöḡ gi najj gimimidim aniḡbu, miñi niḡmim hagnabim, “Pör aniḡ gi najj gimidun u, nable göp. Aniḡ gun nan aij ap udagpun,” a ḡinabim. Nibi bi aniḡ ḡipal gau umniḡ ḡinaböl.

²²Pen miñi God nipe gö, kale nan si nan najj mo gau midmim, yöñ udmim, God nagi wög gep nibi bi rö midmim, God niḡö aij ḡinab adö u nöp gimim, kamiḡ pör pör midep u udnabim. ²³Nan si nan najj gep adö u gi damun, pe udun umnabun; pen Bi Kub hon Jisas Kraiḡ aip ḡim ñöl mideinabun u, God hanip kamiḡ pör pör midep magö u yiḡariḡ ñinab.^l

Kraiḡ hañ roman̄ nipe midpim rö, nipe aip umbe

7 ¹Kale añ mam lo manö niḡbim gau. Kale niḡbim, nibi bi kamiḡ midpal gau nöp lo manö hain ḡinaböl; umeinaböl, marö kalip rimnap midagnab.

ⁱ 6:13 Ro 12:1 ^j 6:14 1Jn 3:6 ^k 6:16 Jon 8:34; 2Pi 2:19 ^l 6:23 Ro 5:12,15

²Manö ap ba gau rö ap midöp. Lo manö ap haga, bi nipe mideinab, nibin nipe nugmul aip midainim; pen nugmul umnab u, lo anibu pis ginab. ³Nibi u nugmul midö niñöl gi, am bi hain nibö ap niñöm udeinab u, nip hagnaböl, “Lo manö rib jumön, ne bi si udep nibi,” a ginaböl. Pen nugmul umö, am bi hain nibö niñöm udeinab u, manö midagöp; “Lo manö rib jumön, ne bi si udep nibi,” a göm, hagagnaböl.

⁴Pen añ mam bi. Anib unbö rö nöp, kale Kraiss hañ romañ nipe midpim gau, nipe aip umbe rö, lo manö ud sisi limidim u arö giñe niñöm Bi ap kalöp udnab. Bi au umöm uraka Bi u kalöp udö, kale God nip aij ginim adö u nöp ginabim.^m

⁵Nöd pen Kraiss hon udaga ñin u, nan si nan najj gep magö u hanip ud sisi limidöp. Lo manö adö u nöp hain gun a gi midmidun u pen gasi najj añ hon dañ piral hiikö, mab asi ñiñ umeb magö u waiö lö, mid aij gimidagun. God aip midep rö laga. ⁶Pen miñi Kraiss aip umbun rö, lo manö hanip nagü rö löm ud sisi limidöp u pak gulu gi lun me, Juda lo manö kali kliñ rikla adö u niñun gagpun; God Ana gasi nöb adö u nöp niñun gipun.ⁿ

Lo midöp rö, nan si nan najj gipun u waiö niñbun

⁷Anib u, hon niñön hagon? God lo manö hagö hagla u, manö najj hagöp, a gun aka? Wasö yabi! U anig hagagun.

Lo midagböp, yad nan si nan najj aigeg rö midöp u niñagbnep. Lo manö adö ap kali kliñ riköm hagla, “Nibi bi rimnap nan kale gau nan yad rö midaiböp, a gimim, gasi u niñagmim,” a gila. Anib u me, yad niñbin, nibi bi rimnap nan kale gau nan yad rö midaiböp a gi gasi niñeinabin u, nan si nan najj ginabin.^o ⁸Anib u, yad gasi niñbin, hainö yad nan si nan najj gem, nibi bi rimnap nan kale gau nan yad rö midaiböp, a gi gasi u niñagnabin. Yad anigöl gasi niñmidin u pen adiñ nan si nan najj gep magö u am gasi rimid yad ñip gi dam arö, nibi bi rimnap nan kale gau iru yabiñ nöp nan yad rö midaiböp a gi gasi u nöp niñnö. Pen lo manö midagböp, nan si nan najj gep magö klö midagböp, bi hadö umöb rö midböp.

⁹Lo manö, u gimön, u gagmön, a gab u, yad nöd niñagmidin. Yad anig gem kamiñ midainö. Pen lo manö u auö, nan si nan najj gep magö u, bi kamiñ midöp rö löm, klö udöm yip ñip gi ud arö, umnö. ¹⁰God lo manö ña u, hanip adan pör midep u yamböp, pen yip umeb magö nöp ña.

¹¹Anib u, yad gasi niñbin, hainö yad nan si nan najj gem, nibi bi rimnap nan kale gau nan yad rö midaiböp a gi gasi u niñagnabin. Yad anigöl gasi niñmidin u pen, adiñ nan si nan najj gep magö u am gasi rimid yad ñip gi dam arö, nibi bi rimnap nan kale gau nan yad rö midaiböp a gi gasi

^m 7:4 Ro 6:2,11 ⁿ 7:6 Ro 8:2; 6:4 ^o 7:7 Eks 20:17; Dud 5:21

niṅnō. Nan si nan najj gep magö u, God lo manö haga u nöp udöm, yip al pak la.^p

¹²Anib u, hon niṅbun, God lo manö u uł midöp. Hon niṅbun, “Nibi bi rimnap nan kale gau nan yad rö midaiböp a gi gasi u niṅagmim,” lo manö anibu, God nipe ke manö klö haga u, uł nöp, kabö rö nöp, aij nöp midöp.^q ¹³God lo aij anibu yip al pak la umnö aka nihön? U wasö! God lo manö aij u hagö niṅbun rö, marö kub anibu udagnabun. Nan si nan najj gipun rö, marö kub anibu udnabun. Pen nipe hanip lo manö haga anibu, gasi ap ke niṅöm hagaga; nan si nan najj gep magö u gac kub yabił midöp u niṅöl, a göm, lo manö haga. Anib u, God lo manö u haglö niṅbin rö, umagnö; nan si nan najj gep magö u, lo manö aij anibu udöm, yip al pak lö umnö.

Nan gagun a gun gasi niṅbun gau nöp gabun

¹⁴Hon niṅbun, lo manö u, God gasi nõ kali kliñ rikla. Anibu pen yad bi nöp midpin; yad nagi wög gep bi rö midem, hibur gasi rimid yad u pör arab nan si nan najj gep adö u. ¹⁵Anib u me, nan aij ginam, a gi gasi niṅbin adö u gagpin; yad nan si nan najj gep adö u, yad magö anibu mulu kal niṅbin u, yad anig gagnam, a gipin adö u nöp gipin. Pen nihön ginig anig gipin u niṅagpin.^r ¹⁶Yad gi najj gagnam, a gi gasi niṅbin adö u nöp gipin rö, yad niṅbin, gasi magö yad abe God lo manö u abe adip adip rö midöp.

¹⁷Uri yad ke nan najj gagpin me. Yad ke najj ginam, a gem, gagpin; nan si nan najj gep magö u gasi hibur midmagö yad aṅ daṅ midöp u nöp göp. ¹⁸Yad niṅbin, yad bi nöp midpin rö, midmagö pri aṅ yad daṅ mid aij gagöp. Gasi hibur midmagö yad gasi aij nõ, nan aij ap gagnabin. Gasi magö yad u, gi aij ginam a gem niṅbin u pen yad ginam rö lagöp. ¹⁹Anig gö me, gi aij ginam, a gi niṅbin adö u gagabin; gi najj gagnam, a gi niṅbin adö u nöp pör ginö arab. ²⁰Anib u, yad gi najj gagnam, a gi niṅbin adö u nöp gabin rö, yad ke nan najj gagabin. Nan si nan najj gep magö u gasi hibur midmagö yad aṅ daṅ midöp u nöp gö gö gab niṅem gabin.

²¹Anib u, yad niṅbin, yad gi aij ginam a gi niṅbin u pen pör gi najj ginam rö löp. ²²⁻²³Gasi yad u God lo ña u ñiñi yabił libin u pen gasi hibur midmagö yad aṅ daṅ unbö ke göm, gasi magö yad u aip pen pen gö, nan si nan najj gep magö u hañ romaṅ yad aṅ gau midöm, yip ud sisi lö, yad bi nagiman rö midpin.^s

²⁴Yad ñiñi lagpin; bi mög gep rö midpin. Gasi hibur midmagö yad u yip al pak linig gab; bi an yip ud kamiṅ yunab? ²⁵Bi Kub hon Jisas Krais nöp! God nip aij a gabin!

^p 7:11 Jen 3:13 ^q 7:12 1Di 1:8 ^r 7:15 Gal 5:17 ^s 7:22-23 Gal 5:17; 1Pi 2:11

Pen manö hagpin i, anig göl midöp: gasi yad u God nip nagi wög gep bi rö midpin u pen midmagö pri an yad dañ au, nan si nan najj gep magö u nagi wög gep bi rö midpin.^t

God Ana hon aip mideinab u, hon aigale nibi bi rö mideinabun

8 ¹⁻²Pen hon Krai Jisas aip jim ñöl midpun u, Krai Jisas nipe umö, God Ana kamiñ magö ñeb u nipe hanip ud kamiñ yuö, hon uri nan si nan najj gep magö u abe, umeb magö u abe, kalip nagi wög gep nibi bi rö midagpun. Anib u, God hanip manö kub hagagnab. ³Pen nibi bi aij midagpun rö, God lo adö u gi damun, mid aij gun rö lagö, God Ñi nipe ke u yuö, bi yabiñ hañ romañ hibur midmagö hon unbö rö löm, aua. Nipe umöm nan si nan najj gep magö u böñ nöp gi ke yuañ, a göm, God nipe Ñi nipe ke nan sabe gep rö yuöm, nan si nan najj gep magö u nibi bi midmagö pri an kale dañ midöp u, manö kub hagöm, pis göp a ga. ⁴God anig ga u, kale gasi najj midmagö pri an hon yañ nibö auöp adö u arö göm, God Ana gasi ñab adö u gi damöm, lo manö yad hagab rö gi aij ginaböl, a göm ga.^u

⁵Nibi bi gasi najj midmagö pri an kale yañ nibö auö, adö anibu nöp gilö aröp gau, hibur midmagö kale nihön gasi göp adö u nöp gasi niñbal. Pen nibi bi God Ana kalip gasi ñö gilö aröp gau, God Ana nihön gasi göp adö u nöp gasi niñbal. ⁶Nibi bi hibur midmagö kale nihön gasi göp adö u nöp gasi niñbal gau, adö anibu nöp nan si nan najj göm umnaböl. Pen nibi bi God Ana nip aij ginab u nöp gasi niñbal gau, adö anibu nöp gi aij göm, God aip jim ñöl kamiñ midöm, mid aij ginaböl.

⁷Nibi bi hibur midmagö kale nihön gasi göp adö u nöp gasi niñbal gau, gasi magö kale God nip kauañ mauañ rö midöp. Gasi magö kale God lo nipe niñagöp; God lo nipe niñnim rö lagöp. ⁸Nibi bi gasi najj midmagö pri an kalip yañ nibö auö, adö anibu gilö aröp gau, God nip aij ginim adö u göl rö lagöp.

⁹Pen kale nibi bi God Ana kalöp an dañ midöp gau, gasi najj midmagö pri an kale yañ nibö auö, adö anibu gagabim; God Ana kalöp gasi ñab adö u nöp gabim. Nibi bi Krai Ana nipe kalip an dañ midagöp gau, Krai nibi bi nipe midagpal.^v ¹⁰Krai nipe an kalöp dañ mideinab u, nan si nan najj gep magö u gö, hañ romañ kale umniñ gab; pen Jisas umö God kalöp niñö, nibi bi aij rö midpim u rö, Ana nipe gö, ana kale kamiñ mideinab.^w ¹¹God gö Jisas uraka u, Ana nipe an kalöp dañ midöp u me, God añi anibu nöp kalöp u rö nöp gö, Ana nipe kalöp an dañ midöp u nipe hañ romañ kale kamiñ midep magö ñinab.

¹²Anib u, añ mam bi, hon naböñ midöp. Gasi najj midmagö pri an hon dañ piñ gi ñö adö anibu gun, naböñ anibu ñagnabun. ¹³Adö anibu gipe

^t 7:25 1Ko 15:57 ^u 8:4 Gal 5:16,25 ^v 8:9 1Ko 3:16; 12:3 ^w 8:10 Gal 2:20

arö, umnig gabim. Pen God Ana u kalöp gi ñö niñöl gi, kale nan si nan naj gipim anibu böñ nöp arö ginabim u, God aip kamiñ mideinabim.^x

¹⁴God Ana gasi ñö niñöl gi ajaböl nibi bi gau, God ñi pai nipe midpal. ¹⁵⁻¹⁶Ana kale udpim u, kalöp lip gi dam arö, kale nöd piñiñ gimidim rö kauyañ piñiñ gimim, nagi wög gep nibi bi rö midagnabim. Ana kale udpim u, nipe gö, God ñi pai nipe midpim. Anig niñöm hon nip “Aba! Bapi!” a gabun.^y

¹⁷Ñi pai nipe midpun u me, nan aij nihön nihön ñi pai nipe ñinab u, hon udnabun. Pen Krai nip hag juöm gi naj gila rö, hanip u rö nöp gi naj gilö, piñiñ gagnabun u, God Krai nip ud aij ga rö, hanip u rö nöp ud aij ginab.^z

Hainö mid aij ginabun

¹⁸Gasi yad niñbin, Krai nip cig midun, marö rimnap gö, utham mideinabun u, u nan pro. Hainö God nipe nan aij yabiñ hanip ñö, nipe aip mid aij ginabun u, u nan kub.

¹⁹God nan nihön nihön gi la gau magöñhalö miñi mid aij ginim rö lagöp. Nan gau magöñhalö abad midö, God nipe ñi pai nipe waiö udnab ñin u nöp, nipe gö, nan anib gau kauyañ mid aij ginab. ²⁰⁻²¹Göp anibu, God hadame nöp niñebir ginab a ga rö nöp göp. Pen God hadame gau niña, ñi pai yad waiö udnabin ñin u, yad ginö, ñi pai yad ñiñi löm mid aij yabiñ ginaböl rö, nan magöñhalö gi linö gau u rö nöp, hij gi lugagöm, ñiñi löm mid aij yabiñ ginab.

Pen nan gi la anib gau, nöd mid aij gagnab. Pen hanip gö, ñi pai nipe ke yabiñ midun nipe aip mid aij ginabun ñin u nöp me, kauyañ gö nan anib gau mid aij ginab.^a

²²Hon niñbun, nan God gi la anib gau magöñhalö mid aij ginig gab u pen hadame nöp marö gö, nibi ñi pai rikniñ gilö ilön göp rö u gimidöp. ²³Pen hon abe marö anibu midöp. Hainö kalip böñ nöp udnig gabin, a göm, God nipe Ana u nöd nöp yuö apöm hanip añ dañ midöp u, pen ñin mai rö hanip ñi pai nipe ke kabö rö yabiñ waiö udö, hañ romañ gisön nibö halu lun, a gun, midmagö hon añ dañ marö anibu gö niñöl gi, minöñ naböñ adö it i abad midpun.^b

²⁴God nan hainö waiö linab a ga manö u niñ udno, hanip uda. Pen nan nihön nihön hainö waiö linab u magöñhalö hadö niñbnop, miñi gasi halö midun ñin hain u abad midagai bnop. Nan hadö niñbal u abadagnaböl. ²⁵Pen, nan hainö waiö linab, a gi gasi u niñjun me, iru gö niñöl gi abad midagpun; gasi halö abad midpun.

²⁶Nibi bi pidöñ midagpun rö, Ana hanip gi ñöl gi midöp. Hon God nip sabe gun a gipun u pen aige gun God nip sabe ginabun u niñagun.

^x 8:13 Gal 6:8; Kol 3:5 ^y 8:15-16 2Di 1:7; Mak 14:36; 2Ko 1:22 ^z 8:15-17 Gal 4:5-7; Rep 21:7 ^a 8:20-21 Jen 3:17-19 ^b 8:23 2Ko 5:2-4

Pen Ana hanip ab hak löm, God nip sabe ginig gab. Manö nibi bi niñeb rö wasö; kadjad manö löm hagnig gab. ²⁷God pen gasi hon magöñhalö niñöb; nipe Ana gasi nipe u abe niñöb. Ana nipe hon Krajs Jisas nibi bi nipe marö udöm, God nip hagö, hagab rö ginab. Ana nipe God nip hagab u, God ginam a göm niñöb adö u nöp hagab.^c

²⁸Hon niñbun, God nip midmagö libun nibi bi gau, God nipe hanip abad midö niñöl gi, nan rimnap ke gagnab; mid aij ginabun adö u nöp hanip ginab. God nipe hadame gau gasi niñöm haga rö, hanip yip aumim a ga.^d ²⁹Pen adö anibu nöp, God nibi bi nöd niña gau, “Yad ginö, kale Ñi yad midöp rö löm, niñin nimam hain nipe iru yabiñ mideinaböl,” a ga.^e ³⁰Anib u, nibi bi Ñi yad rö mideinaböl a ga nibi bi gau, kalip yip aumim a ga. Nibi bi yip aumim a ga nibi bi gau, kalip nibi bi asiñ midagöp a ga. Nibi bi kalip asiñ midagöp a ga gau, Ñi yad mailö aij halö midöp rö, kale u rö nöp mideinaböl a ga.

Hanip midmagö löm abad mid aij göp

³¹Pen hanip anig göm ud aij göp u, an hanip gi naij ginab? Bi ap hanip gi naij ginim rö lagöp, wasö yabiñ!^f ³²God nipe piñiñ gagöm, Ñi nipe ke u hanip nan a göm yuö apöm uma u nan kub yabiñ. Pen God hanip anig ga u me, nipe hanip ud aij göm, nan aij aij nöp hanip u rö nöp ñinab. ³³Pen God nipe hanip hag löp rö, an hanip manö kub hagnab? God nipe ke gö asiñ midagöp rö midpun u, manö midagöp, a ga.^g ³⁴Anib u, bi an hanip manö kub hagnab? Bi ap anig hagnim rö lagöp. Krajs Jisas hanip nan a göm umöm, uraköm, am God ñimagö yijig kid nipe lau adö midöm, hanip a göm, Nap nip sabe göl gi midöp.

³⁵Krajs hanip midmagö yabiñ löp u me, an nip wasö göm hanip ud asik ke linab? Nan ap ke waiö löm, hanip ud asik ke linim rö lagöp.

Hanip marö rimnap ginab aka,
 uñham mideinabun aka,
 kiyö kub leinab aka,
 waij midageinab aka,
 gasi milö niñnabun aka
 bi rimnap hanip, Krajs pig midpal, a göm,
 hanip gi naij ginaböl aka,
 al pak linaböl aka,
 nan nihön ginab,
 Krajs aip jim ñöl nöp mideinabun.

³⁶Manö anibu rö God Manö kali kñiñ riköm hagla,
 “Nöp pig midpun rö, pör hanip niñöm,

^c 8:27 Sam 139:1 ^d 8:28 Ep 1:11 ^e 8:29 Kol 1:18; Hib 1:6 ^f 8:31 Sam 118:6

^g 8:33 Ais 50:8-9

kaj sipsip rö al pak lun a göm niñbal,” a gila.^h

³⁷Anib u, umeb rö aŋ u midpun u pen Kraiss, bi hanip midmagö löm uma u aip midun, aij gö niñöl gi nöp midun, nan anib gau piñiñ gagnabun.

³⁸Adö anibu yad niñbin, umnabun aka mideinabun, God hanip midmagö li nöp mideinab niñöm nan ap hanip ud asik ke linim rö lagöp. God ejol nipe gau, nan pidöñ halö kumi kabö adö lañ midöp gau, nan kal naij gau, nan miñi midöp gau, nan hainö mideinab gau, ³⁹nan adö galik midöp gau, nan mo gayik midöp gau, nan nihön nihön midöp gau magöñhalö, nan ap hanip ud asik ke linim rö lagöp. Bi Kub hon Kraiss Jisas midöp rö, God hanip midmagö li nöp mideinab.

God gasi nipe ke niñöm Isrel kai kalip udnig ga

9 ¹Manö hagabin anibi, yad Kraiss bi nipe midpin rö, piral hagagabin. Ana Uł u gasi magö yad hagab, manö hagabön anibu manö niñö hagabön, a gab. ²⁻³Pen añi mam bi. Isrel nibi bi rimnap Kraiss nip udagpal gau hainö manö kub niñöm, ilön kub udnaböl u, yip mög yabił göp. Anib u, yad gasi iru yabił niñbin. Midmagö yad pör ilön kub göp. Yad niñö nöp hagabin, adan midböp, yad añi mam yad gau kalip nan a gem ilön udnö, kale pen kamiñ arblap.ⁱ

⁴Pen nihön: God Isrel kai nöp kale ñi pai yad mideilañ a göm, mailö aij nipe kalip nöp yamöm, yad kalöp unbö ginabin a göm manö ktö niñö kalip nöp hag ñöm, lo manö nipe u kalip nöp hag ñöm, kale aigöl göm God sabe gep ram u kabö rö sabe göl manö u kalip nöp hag ñöm, yad aigöl gem nibi bi kalip ud aij ginam manö aij u kalip nöp hag ña.^j ⁵Isrel nibi bi nihi itañ kale Ebrahim, Aisak, Jekop bi gau me. Ebrahim, Aisak, Jekop ñi pai riklö, rik dam dapil gi damöm, Isrel nibi bi kalip rik daula. Kigin añi u nöp rik dam dapil gi damöm, Kraiss nip bi yabił rik daula. Kraiss nipe ke God midöm, nibi bi magöñhalö abadab. Kale magöñhalö hib nipe u pör haglö adö arañ.

⁶God Manö haga u, haga rö nöp ga. Isrel ñi pai riklö, rik dam dapil gi damöm, rik daula gau rimnap Isrel nibi bi kabö rö midagpal. ⁷Ebrahim ñi pai riklö, rik dam dapil gi damöm rik daula gau rimnap Ebrahim ñi pai nipe kabö rö midagpal. God Ebrahim nip haga, “Aisak ñi pai riknab gau nöp ñi pai adö nape rö mideinaböl,” a ga.^k ⁸Anib u, Ebrahim ñi pai riklö, rik dam dapil gi damöm, rik daula gau rimnap God ñi pai nipe midagpal. God manö ktö niñö hagö, Ebrahim ñi pai yag daunaböl ñi pai gau nöp, kale God ñi pai nipe midnaböl.^l ⁹God Ebrahim nip manö ktö niñö anibu hagöm haga, “Ñin yad hag linö ñin u nöp yad ado gi aunö, nabin ne Sera ñi ap yag daunab,” a ga.^m

^h 8:36 Sam 44:22 ⁱ 9:2-3 Eks 32:32 ^j 9:4 Eks 9:4 ^k 9:7 Jen 21:12 ^l 9:8 Gal 4:23

^m 9:9 Jen 18:14

¹⁰Pen apis hon Rebeka ñi nipe mihau bi añi nöp rika. Bi anibu bac hon u Aisak. ¹¹⁻¹²Pen God gasi nipe ke niñöb rö ginab. Nibi bi an hag linabin a ginig gab u, hag linab. Kale nan aij rimnap ginaböl u niñöm hag lagnab. God gasi nipe ke niñöb rö ginab. Anib unbö rö nöp me, apis bac hon Aisak Rebeka ber mihau ñi ramö rikaglö magö u, God nipe Rebeka nip haga, “Ñi ne nañi riknabön u, bi kub rö midageinab; nipe ñi ne hain u nip wög gi ñinab,” a ga. Ñi mudun aḡ gau nöp midailö nime yag dauaga adö u nöp, nan aij nan naj ap gilö niñöm wasö, God gasi nipe ke niñöm anig haga.ⁿ ¹³God Manö adiḡ ap kali kñiñ rikla u, God manö hagöm haga, “Yad Jekop nip midmagö libin pen Iso nip midmagö lagpin,” a ga.^o

God nipe gab u, kabö rö nöp gab

¹⁴Anib u, God kabö rö gagab, a gun? Wasö! Nipe kabö rö nöp gab.

¹⁵God nipe Mosis nip haga,

“Nibi bi mög niñnabin gau kalip mög niñnabin.

Nibi bi midmagö lem ud aij ginabin gau

kalip midmagö lem ud aij ginabin,” a ga.^p

¹⁶Anib u niñbun, hane ke klö gun gipun u niñöm hanip udagnab; hane ke klö gun gasi halö midpun u niñöm hanip udagnab. Nipe ke mög niñnab nibi bi gau nöp udnab.^q

¹⁷God Manö adiḡ ap kali kñiñ rikla u, God manö hagöm Pero nip haga, “Yad gasi niñnö, nibi bi ram minöḡ gau gau midpal gau magöḡhalö niñnaböl, ne kiḡ Ijip nibö u bi kub bi klö yabiḡ pen yad God ginö ne bi yihariḡ rö midnabön. Anig ginab, kale niñöm, manö anibu hag amil apil göm hib yad u haglö ram minöḡ gau gau magöḡhalö arnab. Adö anibu nöp yad ke gainö, ne Ijip kiḡ midpan,” a ga.^r ¹⁸Anib u niñbun, God gasi nipe ke niñöb rö, nibi bi rimnap mög niñnab pen nibi bi rimnap kalip niñebir gö, gasi naj kale niñbal u kidit arnab.

¹⁹Kale rimnap God göp anibu rö niñmim hagnabim, “God nipe nöp gö, gasi kale u kidit aröp u, nihön ginig pen, mid aij gagpim, a göm, hanip manö kub hagnab? God nipe ke, ‘Nan anib gau ginab,’ a ginab u, bi an nipe pe, ‘Nan gau gagnab,’ a ginab?” ö ginabim. ²⁰Anig hagnabim u pen kale bi kub an rö midmim, manö nipe u naböḡ udnabim?

Adö anibu rö, God Manö u bi ne Aisaia kali kñiñ riköm haga, “Bi ap minöḡ udöm, rin cög ap gö, ‘Yip nihön ginig anig göl gipan,’ a göm pen ado göm hagnab. Wasö yabiḡ!” a ga.^s ²¹Bi rin cög ginig gab bi u, nipe gasi nipe ke niñöb rö ginab. Minöḡ bad añi ap ud gi dö gi dapöm, rin aij aij ñin añi añi lauep ap löm, rin yihariḡ pör pör lauep ap löm, ginab. U manö midagöp; gasi nipe.^t ²²⁻²³Anib unbö rö me, God göp. Nipe nibi bi gi

ⁿ 9:11-12 Jen 25:23 ^o 9:13 Mal 1:2-3 ^p 9:15 Eks 33:19 ^q 9:16 Ep 2:8 ^r 9:17 Eks 9:16

^s 9:20 Ais 29:16; 45:9 ^t 9:21 Jer 18:6

naij gi midpal gau niṅö, iru yabiḷ gö, kalip al pak linim rö löp u pen, nipe mulu halö midöp u niṅöm klö nipe midöp u niṅlaṅ, a göm, kalip yiṅid anig gagöp. God hadame dagol gau gasi nipe ke niṅöm haga, nibi bi mög niṅem ud aij ginabin nibi bi gau mailö aij yad u niṅöl, a ga. Anib u, nibi bi anib gau mailö aij yad u niṅöl a göm, nipe nibi bi gi naij gi midpal gau gö, gasi hibur naij kale u kidiḷ aröp. ²⁴Nibi bi mög niṅem ud aij ginabin a ga u, hanip Juda nibi bi abe, Juda nibi bi wasö gau abe, haga. ²⁵Manö adö anibu rö, God manö haga rimnap bi ne Hosea God Manö adiṅ ap kali kliṅ riköm haga,

“Nibi bi yad midagmidal gau,
kalip ‘nibi bi yad’ a ginabin.

Pen nibi bi midmagö lagmidin gau,
kalip ‘nibi bi midmagö yad’ a ginabin.

Pen Hosea God Manö adiṅ ap halö kali kliṅ riköm haga,^u

²⁶Nöd ‘Nibi bi yad midagpim,’ a ginö u,
ram minöṅ aṅi anibu nöp kalip,

‘God pör kamiṅ midöp ṅi pai nipe,’ a ginabin,” a ga.^v

²⁷Pen God Manö adiṅ ap, bi God manö hagep Aisaia manö blaṭö göm hagab,

“Isrel kai kabö kuṭup ṅig goṭ gau midöp rö
iru nöp mideinaböl u pen
Bi Kub nipe yöp pro bad ap nöp
ud kamiṅ yunab.”^w

²⁸Nihön ginig: Bi Kub nipe dip nöp
nibi bi minöṅ naböṅ iṭ i midpal gau
magöṅhalö manö kub hagöm
böṅ nöp pen ṅinab,” a ga.

²⁹Ginab anibu, Aisaia nipe nöd God Manö adiṅ ap kali kliṅ riköm haga,

“Bi Kub ke pidöṅ halö midöp u,
hanip ṅi pai yöp bad ap nöp arö gagböp,
Sodom Gomora nibi bi kalip ga rö u,
hanip gi böp,” a ga.^x

Isrel kai abe Jisas manö aij u niṅ udlaṅ

³⁰Anib u, niṅjim! Juda nibi bi wasö gau, nöd, mid aij gun God aip jim ṅöl midaiun a göm gasi u niṅagla u, pen miṅi Jisas manö aij u niṅ udlö, God kalip asiṅ midagöp a gö, nipe aip jim ṅöl midpal. ³¹Pen Isrel nibi bi nöd God lo manö u udöm, hagöp hagöp rö gun a giḷa u pen miṅi nipe aip jim ṅöl midagpal. ³²Pen nihön, God nip niṅ udöm wasö, hon ke adö rimnap gun, nipe aip jim ṅöl mideinabun, a göm, God nipe kabö aij la

^u 9:25 Hos 2:23 ^v 9:26 Hos 1:10 ^w 9:27 Ais 10:22-23 ^x 9:29 Ais 1:9

adö u arun a gilö niñöl gi, ma kale u li yuö ap lug pakpal.^y ³³Manö anibu rö, Aisaia nipe God manö haga rö kali kliñ riköm haga,

“Niñim! Yad daun kub Saion kabö ap linö,
nibi bi ma adö anibu li yuö ap lug paknaböl;
pen nibi bi nip niñ udnaböl gau,
God nip niñöm ana udagnaböl,” a ga.^z

**God nipe ke gö, kale nibi bi nipe asiñ midagöp rö
mideinaböl u, Isrel nibi bi kale niñagal**

10 ¹Mideimam yad gau. Gasi klö yip auöp u, God nibi bi yad Isrel kai kalip ud kamiñ yunim, a gem, nip pör nöp sabe göl gi midpin. ²Yad kale gipal rö niñem hagabin, hon God nibi bi nipe midaiun, a göm, klö yabiñ gipal u pen gasi niñ aij göm gagpal. ³“Krais uma rö, God hanip, ‘Nibi bi asiñ midagöp yad,’ a ginab,” a göm gasi u niñblap u pen adö anibu niñ aij gagöm, gasi kale ke adö u nöp niñöm hagla, “Lo adö u gino areinab u, nibi bi aij nipe mideinabun,” a gila. Anib u, lo manö adö anibu hain gun a göm gi damöm, hainö ap lug pakla. ⁴Krais ga anibu, uri lo u pis göp. Anib u me, nibi bi an an Jisas manö aij u niñ udnaböl gau, God kalip magöñhalö nibi bi asiñ midagöp yad a ginab.

Nibi bi ram minöñ gau gau magöñhalö kamiñ aröl rö löp

⁵God Manö u, Mosis manö rimnap kali kliñ riköm, lo manö udöm asiñ midagöp rö mideinaböl manö adö u hagöm, Isrel kai kalip haga, “Lo manö u udmim, hagöp rö nöp gimim me, kamiñ arnabim,” a ga.^a ⁶God Manö u, Mosis manö rimnap kali kliñ riköm, Krais nip niñ udöm asiñ midagöp rö mideinaböl manö adö u hagöm, Isrel kai kalip haga, “Kale, ‘Bi an adö lañ arnab?’ ö gagmim,” a ga. (Manö haga u iñ u me, kale am kumi kabö adö lañ au nibö Krais nip uñ gi dauagnaböl.)^b ⁷Anib unbö rö nöp, “Kale, ‘Bi an wip ana ram midöp mo gayik arnab?’ ö gagmim,” a ga. (Manö haga u iñ u me, kale am wip ana ram midöp mo gayik nibö Krais nip uñ gi dauagnaböl.) ⁸Pen God Manö adiñ anibu, Mosis manö adö rimnap nihön nihön kali kliñ riköm Isrel kai kalip haga. Nipe haga, “Manö magö anibu miñö gau midagöp. Manö magö anibu midmagö añ kale dañ midöp pör hagpim adö u nöp,” a ga. Mosis nipe Jisas manö aij, manö niñ udep anibu nöp haga. Manö aij niñ udep anibu nöp hon pör nöp hag ñabun u me.

⁹Anib u, God gö Jisas uraköp a gimim, gasi u niñ midmim, “Jisas nipe Bi kub yad,” waiö hagnabim u, God kalöp nibi bi asiñ midagöp yad a göm, kalöp ud kamiñ yunab. ¹⁰Pen nihön, kale gasi midmagö añ kale dañ manö nipe niñ udnabim u, God kalöp nibi bi asiñ midagöp yad a

^y 9:32 Ais 8:14 ^z 9:33 Ais 28:16; 1Pi 2:6 ^a 10:5 Lep 18:5 ^b 10:6-9 Dud 30:12-14

ginab. Meg miġan kale manö hāgmim, nibi bi gau waiö hag ñinabim u, God kalöp ud kamiñ yunab. ¹¹ Adö anibu rö, Aisaia niġe God Manö adiñ ap kali kliñ riköm haga, “Nibi bi nip niñ udnaböl gau, God nip niñöm ana udagnaböl,” a ga.^e ¹² Juda nibi bi gau, Juda nibi bi wasö gau, ke ke midagpal. Bi Kub niġe nibi bi gau nibö gau nibö magöñhalö Bi Kub añi nöp midöp. Nibi bi gau nibö gau nibö an an nip sabe ginaböl gau, kalip ud aij yabił ginab.^d ¹³ Adö anibu nöp, bi ne Joel, God Manö adiñ ap kali kliñ riköm haga, “Nibi bi an an Bi Kub nip, yip ud kamiñ yu, a göm hag niñlö, kalip ud kamiñ yunab,” a ga.^e ¹⁴ Pen kale Bi Kub nip niñ udagnaböl u, kale nip aigöl göm sabe ginaböl? Pen kale Jisas manö aij u apdi niñagnaböl u, kale aigöl göm manö aij anibu niñ udnaböl? Pen nibi bi rimnap apöm Jisas manö aij adö u hag ñagnaböl u, kale aigöl göm manö anibu apdi niñnaböl? ¹⁵ Pen nibi bi Krai Jisas niñ uđpal gau kalip hag yuagnaböl u, kale aigöl göm arnaböl? Adö anibu nöp, Aisaia niġe God Manö adiñ ap kali kliñ riköm haga, “Nibi bi manö aij daunaböl gau, gi aij yabił ginaböl,” a ga.^f

¹⁶ Pen Isrel nibi bi Krai Jisas manö aij u niñla gau rimnap niñ udagla. Manö adö anibu nöp, Aisaia niġe God Manö adiñ ap kali kliñ riköm haga, “Yad manö aij ne u hagnö ji bi an niñ udöp?” ö ga.^g ¹⁷ Anib u, nibi bi rimnap God manö hag ñilö, nibi bi niñöm manö anibu niñ udnaböl. Pen God manö hag ñilö, niñ udnaböl u, Krai manö aij u me. ¹⁸ Pen Isrel kai manö anibu niñagla aka niñön? Wasö yabił! Niñla. Kale nöd niñla u me, Depid niġe God Manö adiñ ap kali kliñ riköm haga,

“Kale ram minöñ gau gau magöñhalö amöm,
manö anibu hag ñibal;

kale manö hag ñilö,

minöñ naböñ gau rigoñ rigoñ magöñhalö yabił aröp,” a ga.^h

¹⁹ Pen yad hag niñeb ap halö midöp: Isrel kai manö anibu niñöm ił u niñagla aka niñön? Wasö yabił! Ił u niñla. Mosis niġe God manö haga u udöm, God Manö adiñ ap kali kliñ riköm haga,

“Yad nibi bi hauł halö miġan rimnap kalip udem, ud aij ġinö,
kale Isrel nibi bi kalip mulu kal niñmim,

God hanip rö anig gagöp, a ġimim niñnabim,” a ga.ⁱ

²⁰ Aisaia niġe God manö haga u udöm God Manö adiñ ap kali kliñ riköm waiö yabił hagöm haga,

“Nibi bi yip niñun a göm ułhai niñagal gau
yip ułhai niñbal;

kale yip niñun a göm hag niñagal

pen yad ke kalip waiö lajin yip niñbal,” a ga.^j

^c 10:11 Ais 28:16 ^d 10:12 Ap 15:9 ^e 10:13 Joe 2:32 ^f 10:15 Ais 52:7 ^g 10:16 Ais 53:1

^h 10:18 Sam 19:4 ⁱ 10:19 Dud 32:21 ^j 10:20 Ais 65:1

²¹Pen Isrel gipal rö, Aisaia nipe God manö haga u udöm, God Manö adiñ ap kali kñiñ riköm haga,

“Yad pör bi niñeb kale rö midem,
‘Yad auim!’ a gipin pen yip auagal.

Kale azeb azeb nöm,
gasi kale ke niñbal rö nöp gipal,” a ga.^k

God Isrel kalip böñ nöp arö gagöp

11 ¹Anib u, yad hag niñeb ap midöp: God Isrel nibi bi gau kalip böñ nöp arö göp aka? Wasö yabi! Kalip böñ nöp arö gagöp. Yad Pol u rö nöp Isrel nibö bi. Ebrahim rikö, rik damöm, Benjamin nip riköl; Benjamin pen rik dam dapil ga iñ u, yad midpin.^l

²Pen God nibi bi hadame nöp niñöm, nibi bi yad midaiöl, a gi gasi niña gau kalip arö gagöp. Kale bi Ilaija nip aiud udöm God Manö kali kñiñ rikla u hadö niñbim. Ilaija God nip sabe göm haga, ³“Isrel nibi bi gau magöñhalö nöp arö göm, bi manö ne hagep gau kalip al pak löm, kabö kinañ göm nan pak nöp sabe gep kabö gau, pa jö ma jö gi yubal. Yad añi nöp midpin u pen yip u rö nöp, al pak lun, a göm, ridik gi ud ajaböl,” a ga.^m ⁴Hagö, God nip pen haga, “Bi yad iru yabiñ nöp sepen dausan rö (7,000) midpal gau, Bal god piral u nip, ‘Bi kub hon,’ a göm, nip sabe gagpal,” a ga.ⁿ

⁵Anib u rö, God nibi bi mög yabiñ göp u me, nipe hanip nibi bi Isrel yöp bad ap mög niñöm hag lö midpun. ⁶Hanip mög niñöm udöp anibu, lo adö u gaino aka nan rimnap ke gaino niñöm udagöp. Hanip yihariñ mög niñöm udöp a gi gasi niñbun u, pen hon nan ap ke gaino hanip udaiböp, hon anig gasi niñagbnop.^o ⁷Nibi bi Isrel klö yabiñ göm, ulhai niñ damöm, udagla. Nibi bi God udnabin a göm hag la gau nöp udla. God nipe ke gö, nibi bi rimnap manö nipe u niñöm niñagla.

⁸Adö anibu nöp, Mosis God Manö adiñ ap kali kñiñ riköm haga,

“God nipe gö, kale hon hanöm,
amgö ju ju gi mideila;

nipe gö, kalip amgö we gö,

amgö niñageila;

nipe gö, kalip hauñ alö,

manö apdi niñageila;

anibu nöp mid damöm,

uri unbö rö nöp midpal,” a ga.^p

⁹Pen Depid God Manö adiñ ap kali kñiñ riköm haga,

“Kale pör nan kub niñbal u,

^k 10:21 Ais 65:2 ^l 11:1 1Sa 12:22; Sam 94:14; Plp 3:5 ^m 11:3 2Ki 19:10,14 ⁿ 11:4 1Ki 19:18

^o 11:6 Gal 3:18 ^p 11:8 Dud 29:4; Ais 29:10

kalip wanaŋ hel rö ud sisi linim.

Arun a gi gasi niŋnaböl adan anibu piŋ ginab.

Anib u, kale gi najiŋ gipal u, kale pen udnaböl.⁹

¹⁰ Amgö kale we gö amgö niŋagöl.

Minjör kub auö pör uŋham wabi gi ud ajaiöl,” a ga.

God Juda nibi bi wasö gau udab

¹¹ Pen Isrel kai ap lug pakpal u, böŋ nöŋ ap lug pakagpal. Kale nan si nan najiŋ giŋa rö, God kalip arö göm, Juda nibi bi wasö gau kalip udöp. Udöp anibu, “Isrel kai, ‘Hanip rö anig göm udagöp,’ a göm niŋlaŋ,” a göm göp.^r

¹² Pen Isrel kai nan si nan najiŋ geila rö, nibi bi ram minöŋ gau gau nan aij yabiŋ udpal. God Isrel kai arö ga rö, Juda nibi bi wasö gau nan aij yabiŋ udpal. Anib u, God nibi bi Isrel ud kamiŋ yunab ñin u, nibi bi nipe gau magöŋhalö nan aij aij yabiŋ udnaböl.

¹³ Yad uri kalöp Juda nibi bi wasö gau hagabin. Krais Jisas yiŋ, “Juda nibi bi wasö gau kalip manö aij yad hag ñimön,” a ga u me, kalöp Juda nibi bi wasö gau Jisas manö aij u hag ñi midnö yiŋ aij göp. ¹⁴ Pen yad kalöp Jisas manö aij u hag ñinö niŋbe, nibi bi yad ke Isrel rimnap niŋöm, “God kalip udöp rö hanip udagöp,” a göm nip auaiöl u, yiŋ aij yabiŋ ginab. ¹⁵ God Isrel kai kalip arö ga rö, Juda nibi bi wasö gau kalip, nibi bi yad, a göm udöp. Anib u, hainö Isrel kai kalip udö, wip umöm kauyaŋ uraknaböl u rö ginab.

¹⁶ Kale bred adiŋ ap God nip sabe gi ñinaböl u, bred magö magöŋhalö God nan nipe. Kale hagnaböl, “Mab olip iŋ u God mab iŋ nipe,” a ginaböl u, ramö löm lö pa gau gau arnab u abe God nan nipe.

¹⁷ Pen God nipe mab olip lö kid nöd nibö gau hak yuöm, kalöp olip lö be gau nibö rö dapöm dim ñö, dim ñöl midpim. Anib u me, mab olip nöd nibö u kamiŋ midöm minöŋ yaŋ nibö ñig u udö, lö hain nibö u mid aij göp.^s ¹⁸ Kale mab lö nöd nibö u, lö yihariŋ, a gimim gasi u niŋagmim. Kale niŋmim, kale mab lö hain nibö u ñig udmim mab iŋ u ñagpim; mab iŋ yaŋ ñig udöm kalöp mab lö aŋa ñöb. ¹⁹ Kale hagnabim, “God nipe, ‘Olip lö be gau nibö dapem ud dim ñinam,’ a göm, olip lö nöd nibö gau hak yuö, ka anibu udun midpun,” a ginabim. ²⁰ Manö anibu niŋö hagnabim u pen niŋ aij gimim. Isrel kai Krais nip niŋ udaglö, kalip arö ga; kale pen Krais nip niŋ udpe, kalöp uda. Pen kale ana udmim, hib kale ke hagpe adö aragnim. ²¹ Nihön giŋig: God mab olip lö nöd nibö gau hak yua rö, kale u rö nöŋ ginim rö löp.

²² God nipe bi hain aij yabiŋ u pen nipe bi ktö yabiŋ rö midöp. Nibi bi nip arö giŋa gau kalip bi ktö rö löm arö ga. Pen kalöp agamij hain riköm,

⁹ 11:9-10 Sam 69:22-23 ^r 11:11 Ap 13:46 ^s 11:17 Ep 2:11-19

midmagö löm, uda. Kale anig göl Kraiſ nip niſ udöl gi mideinabim u, kalöp agamij hain riköm, midmagö löl gi mideinab. Pen Isrel kai kalip ga rö, hanip u rö nöp ginim rö löp, a gimim, niſ aij gimim.^t 23 Isrel nibi bi anib gau hainö Kraiſ nip niſ udnaböl u, God kalip ud pa dim ñinab. God kalip ud pa dim ñinim rö löp. 24 Pen nihön, kalöp mab olip lö be gau nibö dapöm, mab olip yabił pa dim ñö midpim u, olip lö kabö göl gau kauyaſ pa dim ñinig, pa dim ñinab.

Hainö Isrel nibi bi magöŋhalö kalip udnab

25 Pen añ mam bi. Hib kale ke hagpe adö arnim rö löp. Anib u, manö nöd niſagmidun ap kalöp hagnig gabin. Isrel nibi bi iru nöp miñi amgö we rö midpal u pen pör anig gagnab. God Juda nibi bi wasö gau kalip udnabin a göm gasi niſa gau magöŋhalö udnab. 26 Nibi bi anib gau ud pis göm, hainö Isrel nibi bi kalip magöŋhalö ud kamiſ yunab. Manö adö anibu rö, God manö haga u udöm God Manö adiſ ap kali kliš riköm hagla,

“God haga,

‘Jekop kigin yiſ arö gila gau
kalip ud kamiſ yunab bi u,
daun kub Saion nibö aunab.”

27 Yad kalip aip manö klö niſö hagnö rö,

nan si nan naij giſal gac u hik gi yunabin,’ a ga,” a gila.”

28 Isrel kai Kraiſ niſ udagla rö, kale God kauał mauał nipe midpal. Pen kale Kraiſ niſ udmim, miñ miñ göl gi midpim. Pen God hadame nöp Isrel kai nihi iłaſ kale Ebraham Aisak Jekop bi gau kalip manö klö niſö haga u niſöm, God Isrel kai midmagö löl gi nöp midöp. 29 God nipe nan aij ap ñöm, hainö gasi hain nibö niſöm, nan aij anibu adog udagnab. Anib unbö rö nöp, God nipe, ginabin a göm, manö klö niſö hageinab, hainö gasi hain nibö niſöm, ke gagnab. Manö hagnab u arö gagnab. Hagnab rö nöp ginab.

30 Kale nöd God manö haga u ud yumidim pen hainö Isrel nibi bi God manö nipe arö gilö, kalöp pen mög niſöm ud aij gö, nipe aip mid aij giſim. 31 God kalöp mög niſöm uda u, Isrel nibi bi niſlö, mulu lugö, Kraiſ manö aij u ud yula, pen hainö God kalip u rö nöp mög niſöm udnab.

32 Anib u niſbun, Isrel nibi bi gau abe, Juda nibi bi wasö gau abe, God manö haga u ud yula rö, God kalip magöŋhalö niſebir arö gö, kale bi nagiman rö midöm, nan si nan naij gi dam dam ud arlö, hainö kalip mög niſöm udnab.

God hib nipe pör hagno adö araſ

33 Anib u, yad niſbin, God nan magöŋhalö niſöb;

^t 11:22 Jon 15:2,4 ^u 11:26 Ais 59:20-21 ^v 11:27 Jer 31:33-34

gasi nipe gasi aij yabił.
 God nipe gasi niŋ kid yabił niŋ hiiköm,
 adö anibu ke yabił göp.
 God nipe gasi niŋöm,
 nan aniŋ aniŋ ġinabin a göm, gasi aij niŋöb rö,
 bi ap gasi aij unbö rö midagöp.
 Hon God gasi rimid nipe niŋun,
 nipe ke göp rö gun a gun, gagnabun!™

34 God Manö u kali kłiñ riköm hagla,
 “Nibi bi an, Bi Kub gasi aij niŋöb rö u niŋöb?
 Nibi bi an, Bi Kub nip, ‘Ne aniŋ ġi, aniŋ ġi,’ a ġinab?ˆ

35 Pen nibi bi an, nan aij ap God nip ñö, pen ñinim?
 Wasö yabił! Nibi bi ap nip aniŋ göl rö lagöp,” a ġila.ˆ

36 Nihön ġiniŋ: God nipe nan gau magöñhalö ġi la;
 kłö nipe nöp nan anib gau magöñhalö midöp;
 nan anib gau magöñhalö God nip ñiñi löl ġi midöl.
 Anib u, hib nipe u pör pör nöp hagno adö arnim!
 Anib unbö rö aij.ˆ

God lau adö midpun, a ġimim, nip aij ġinim adö u ġipe arnim

12 ¹ Anib u, añ mam bi. Kalöp möġ niŋöm udöp rö, kale pe nan God
 nip sabe ġi ñibal rö, hañ romanġ gasi rimid kale u, nan kamiñ
 halö rö, nan uł rö, God nip ñimim. Nan damöm, God nip sabe ġi ñibal
 gau, nan naj naj gau ñagpal. Nan aij aij nan ap gagöp gau nöp ñilö me,
 nipe ñiñi löm udöp. Aniŋ unbö rö me, God hanip nan nip sabe ġi ñibal rö
 udnim, a ġimim, nip niŋ udöl ġi midmim, hagöp hagöp rö nöp ġimim.ˆ

² Pen nibi bi minöŋ adö ił i gasi niŋöm ġipal nagi adö u rö gagmim.
 Pen God nip hag niŋbe, nipe kalöp gasi aij ñö, gasi rimid midmagö kale
 aŋ daŋ hain ñibö limim, nibi bi ke hain ñibö rö limim. Anib u, kale
 niŋnabim, hon aigöl ġino, God nip aij ġinim. Kale niŋnabim adan nihön
 adan aij yabił; kabö göl nöp ġinab adö u niŋnabim. Pen kale aniŋ göl niŋ
 aij ġimim, aniŋ unbö rö nöp ġinabim. ³ God yip möġ niŋöm udö, wög
 nipe ġipin. Anib u, kalöp magöñhalö hagabin, hon nibi bi kub a ġi gasi
 niŋagmim. God nipe niŋ udep magö u kalöp ke añi añi ñöb. Anib u me,
 kale ana udmim, hon aigale nibi bi rö midpun a ġimim niŋmim.ˆ

⁴ Hon niŋbun, hon magöñhalö hañ romanġ añi midöp u pen adiŋ adiŋ
 ke ke iru nöp midöp. Adiŋ gau wög ke ke midöp; ma u wög nipe u ke göp,
 ñimagö u wög nipe u ke göp, amġö u wög nipe u ke göp. Anib u, ił ke ke
 midöp rö, ił ke ke nöp ġipal.ˆ

™ 11:33 Ais 55:8-9 ˆ 11:34 Ais 40:13; 1Ko 2:16 ˆ 11:35 Job 41:11 ˆ 11:36 1Ko 8:6

ˆ 12:1 Ro 6:11,13; 1Pi 2:5 ˆ 12:3 1Ko 12:11; Ep 4:7 ˆ 12:4-5 1Ko 12:12,27

⁵ Anib u rö, hon Krais lau adö midpun gau u rö nöp wög ke ke gipun u pen nibi bi kigin nipe jim ñöl añi u nöp midpun. ⁶ God hanip añi añi mög niñöm ud aij göm, nan aij hanip ke ke ñöb rö, adö anibu nöp niñun ginabun. God nibi bi rimnap nan aij ñöm, manö yad nibi bi gau hag ñimön, a geinab u, nipe God niñ udep magö ñöb rö hag ñinab. ^d ⁷ God nibi bi rimnap nan aij ñöm hagnab, nibi bi gau wög rimnap gi ñimön a ginab u, nibi bi gau wög rimnap gi ñinim. God nibi bi rimnap nan aij ñöm hagnab, nibi bi ñi pai bi gau manö aij rimnap hag ñimön, a ginab u, nibi bi ñi pai manö hag ñinim. ⁸ God nibi bi rimnap nan aij ñöm hagnab, añ mam ne ap iru gainim u, nip manö hag ñi aij gimön, nipe gasi aij niñöm ñiñi linim, a ginab u, nipe unbö rö ginim. God nibi bi rimnap nan aij ñöm hagnab, nibi bi gau mani nan gau ulep göp u, kalip mani nan rimnap ñimön a ginab u, mani nan rimnap abönamö ñinim. Nibi bi rimnap nan aij ñöm hagnab, nibi bi rimnap kalip abad midmön a ginab u, nipe gasi niñ aij göm kalip abad midnim. Nibi bi rimnap nan aij ñöm hagnab, nibi bi rimnap kalip mög niñmön ud aij gimön a ginab u, nipe ñiñi löl gi mög niñöm ud aij ginim.

Nibi bi gau kalip midmagö limim

⁹ “Nibi bi gau kalip midmagö labun,” a gimim, piral hagagmim; kalip midmagö yabiñ limim, ud aij yabiñ gimim. Nan si nan najj gep magö u nip koñmañ kale rö mulu kal niñmim. Pen kñö gimim nagi aij adö u nöp udmim. ¹⁰ Nibi bi añ mam bi pen pen midmagö libal rö, kale Krais lau adö midpim u rö nöp añ mam bi pen pen midmagö limim. Añ mam bi kale gau hib kale hagpe adö arnim; pen hib kale ke gipe adö aragnim. ^e ¹¹ Wög iru maru gagmim; kñö gimim gimim. Bi Kub hon u nip wög gabun a gimim, aij gö niñöl gi gimim. ¹² Bi Kub hanip udnab, a gimim, aij a gö niñöl gi, nip abad midaimim. Kalöp marö rimnap auainim, agamij midaimim. God nip sabe gep u arö gagmim, pör nöp sabe göl gi midaimim. ^f ¹³ Nibi bi God lau adö midöm, mani nan kale ulep göp gau, kalip mani nan rimnap nime li ñimim. Nibi bi milö gau nibö auaiöl, uñ gi dam ram kale ud armim. ^g

¹⁴ Nibi bi rimnap kalöp gi najj gaiöl u, pen pe, “God nip sabe gino kalip gi najj gañ,” a gimim sabe gagmim; “God nip sabe gino kalip gi aij gañ,” a gimim sabe gimim. ^h ¹⁵ Nibi bi rimnap kale ñiñi löl gi midaiöl, kale kalip aip ñiñi löl gi midaimim; pen rimnap mög gep rö midaiöl, kale kalip aip mög gö niñöl gi midaimim. ¹⁶ Nibi bi hib midöp gau kalip ud aij gun, nibi bi hib midagöp gau kalip ud aij gagun a gimim, gasi u niñagmim. Kalip magöñhalö adip adip rö ud aij gimim. Hon nibi bi

^d 12:6-8 1Ko 12:4-11; 1Pi 4:10-11 ^e 12:10 1Pi 1:22 ^f 12:12 1De 5:16-18

^g 12:13 Hib 13:2 ^h 12:14 Mad 5:44; 1Ko 4:12

hib midöp, a gimim, gasi u niŋagmim. Nibi bi hib midagöp gau aip aŋ hakmim midaimim. Hon nöp niŋ aij gipun, a gimim gasi u niŋagmim.ⁱ

¹⁷Pen nibi bi rimnap kalöp niŋlö mulu lugö, gi najj gaiöl u, kalip pen u rö nöp gi najj gagmim. Nibi bi gau niŋlö, aij ginim adö u nöp gimim.^j

¹⁸Nibi bi rimnap aip pen pen gun, a gimim gasi u niŋagmim. Nibi bi gau magöŋhalö agamij jim ñöl midaiun, a gimim gasi u nöp niŋmim. ¹⁹Pen nibi bi aij yad gau. Nibi bi rimnap kalöp gi najj gaiöl u, kalip pen gi najj gun, a gimim, gasi u niŋagmim. U God nan nipe, a gimim niŋmim. Yad kalip pen abe gi najj gin, a göm, ke gasi niŋöb rö ginab. Mosis nipe God manö haga u udöm, God Manö adiŋ ap kali kliñ riköm haga, “God hagöp, ‘Kalöp gi najj gaiöl u, yad kalöp pen abe gi najj ginabin; u gasi yad,’ a göp,” a ga.^k ²⁰Anib u, bi ne Solomon God Manö adiŋ ap kali kliñ riköm haga,

“Nibi bi kalöp nöd gi najj gila gau
kale kiyö linim u, nan magö ñimim;
kale ñig nan ginim u, ñig ñimim.

Anig ginabim u, bi kalöp nöd gi najj gila gau
nabic kale adö laŋ mab ineb ineb rö yunabim innab niŋnaböl,” a
ga.^l

²¹Anib u me, kalöp gi najj gaiöl, kalip pen gi najj gagmim; kalöp gi aij gipe, ke hain gö arnim.

Gapman kai hagöl rö gimim

13 ¹Pen hon magöŋhalö gapman hagöl rö niŋun. Ke gasi niŋöm, gapman midagöp; God hagö, gapman midöp.^m ²Anib u, nibi bi an gapman manö rib jueinab, God haga gapman midöp manö nipe u abe rib junab. Bi anibu God nip manö kub hagnab. ³Nibi bi gi aij ginaböl gau, bi gapman bi kub gau aninin gö piñiŋ gagnaböl; nibi bi gi najj ginaböl gau nöp, bi gapman bi kub gau aninin gö piñiŋ ginaböl. Anib u, bi gapman bi kub gau piñiŋ gagun, a gi niŋnabim u, mid aij gimim niŋöm bi gapman gau, “Kale gi aij gipim,” a ginaböl.ⁿ ⁴Pen nihön: God hagö, gapman bi gau, wög gep bi nipe rö midöm, kalöp abad midlö me, kale mid aij ginabim. Pen kale niŋ aij gimim, gi najj gagmim; gapman bi ru milö kid ud ajaböl u, yihariŋ ud ajagaböl. God hagö, gapman bi gau, wög gep bi nipe rö midöm, nibi bi gau gi najj geinaböl u, kalip dam manö kub hagöm, pen ilön ñinaböl.

⁵Anib u, pen ilön udun rö löp a gun, gapman manö u hain gagun; God gapman niŋebir hag lö, hanip abad midpal u me, nihön ginig gapman manö rib juun a gun, manö kale hain gun agamij mid aij gun.

ⁱ 12:16 Pro 3:7 ^j 12:17 1De 5:15 ^k 12:19 Dud 32:35; Mad 5:39 ^l 12:20 Pro 25:21-22; Mad 5:44 ^m 13:1 Dai 3:1; Pro 8:15 ⁿ 13:3 1Pi 2:13-14

⁶ Adö anibu nöp me, dakis u rö nöp ñun. God gapman bi gau kalip niñebir hagö, gapman wög kale anibu göm, pe udpal.^o ⁷ Nan naböj kale nan nihön nihön rö midainim u, naböj magöñhalö ral pis gimim. Gapman dakis ñeb u, kalip dakis ñimim. Nibi bi rimnap dakis adö ke rimnap ñeb u, kalip u rö nöp dakis ñimim. Nibi bi manö kale niñ udep gau, manö kale niñ udmim. Nibi bi hib dap raneb gau, hib kale dap ranmim.

Pen pen midmagö limim

⁸ Nan naböj kale rimnap midainim, böj nöp naböj ral pis gimim. Pen hon nan naböj añi ap midöp hon naböj ral pis gipun, a gun hagagnabun; nibi bi pen pen midmagö lep naböj anibu hagabin. Nibi bi gau kalip midmagö linabun u, God lo manö haga haga rö nöp ginabun.^p ⁹ God nipe ke manö klö haga u, Mosis nipe God Manö adiñ rimnap kali klñ riköm haga, “Nibi si bi si gagmim; wip al pakagmim; nan si udagmim; nibi bi rimnap nan kale gau nan yad rö midaiböp, a gimim gasi u niñagmim,” a ga. God manö klö rimnap halö haga. Pen God manö klö nihön nihön haga u manö il añi u nöp midöp: “Kale ke midmagö libim rö, nibi bi gau kalip u rö nöp midmagö limim.”^q ¹⁰ Kale nibi bi rimnap midmagö linabim u, kalip gi naj gagnabim. Adö anibu nöp, kale nibi bi midmagö linabim u, God lo manö haga haga u magöñhalö hain ginabim.^r

¹¹ Ñin midpun añ anibi niñ aij gimim. Jisas niñ hadame nöp niñ udun, hainö God nipe nibi bi yad ke, a göm, hanip böj nöp dam ram nipe adö lañ au ud arnab, a gi gasi niñmidun. Pen mi rimnap ap ara, ñin anibu uri söl midöp. Anib u me, nihön ginig hon han hauñ gi midpim? Urakmim, gasi niñöl gi midaimim.^s ¹² Rapin sibön añ midpun rö, ram runig gab. Anib u me, kale nan nihön nihön sib añ yañ rö ajöm gi naj gimidal adö u arö gun, Seden aip pen pen gep sior klö usajil bad klö nan mailö halö God ñöb gau ud yimun.^t ¹³ Anib u, hon Jisas mailö aij nipe adö u midpun, a gun, gi aij göl gi mideinabun. Pen nan iru yabiñ ñiñöm, ñig klö niñ hauñ löm, nibi si bi si göm, hañowañ göm, pen pen göm, nan kale nan yad rö midaiböp a göm gipal gau gagun.^u ¹⁴ Pen kale Bi Kub Jisas Krais ud wañj rö yimim, midmagö pri añ hon dañ gasi göp adö u aigöl gun ginabun a gimim gasi u niñagmim.^v

Asi masi gipal gau kalip hag gagmim

14 ¹ Nibi bi rimnap Krais Jisas niñ niñ udpal u pen niñ ud pidöj gagöm, gasi miñöngöl niñbal gau, “Kalip udun hag amil apil gino,

^o 13:6-7 Mad 22:21 ^p 13:8 Mad 22:39-40; Jem 2:8 ^q 13:9 Eks 20:13-15,17;

Dud 5:17-19,21 ^r 13:10 1Ko 13:4-7 ^s 13:11 Ep 5:14; 1De 5:6-7 ^t 13:12 1Jn 2:8

^u 13:13 Luk 21:34; Ep 5:18 ^v 13:14 Ep 5:11

gasi niŋ aij göl,” a gimim, hag gagmim; kale Jisas Kraiŋ nŋp niŋ udpal u, nibi bi hon, a gimim, ud aij gimim.^w ²Hon niŋbun, nibi bi rimnap Kraiŋ Jisas nŋp niŋ ud midöm, nan gau abönamö niŋbal; pen nibi bi rimnap, Kraiŋ Jisas nŋp gasi adö adö nöp niŋ udöm, nŋp aij gagnab, a göm, kaj wal wayöŋ nan gau hil göm, yiŋariŋ nan magö haŋ nöp niŋbal.^x ³Pen nibi bi nan haŋwafö niŋbal gau, nibi bi nan hil gŋpal gau kalŋp hag juagöl. Nibi bi nan hil gŋpal gau, nibi bi nan abönamö niŋbal gau, God niŋö nan si nan naij gaböl, a göm, kalŋp hag gagöl. Nihön ginig: God nibi bi anŋb gau kalŋp udö, nibi bi niŋe midpal.^y ⁴Bi wög gep ap bi kub niŋe nŋp wög rimnap geinab, ne niŋmön, gi aij gŋpan aka gi aij gagpan, a gimön hagagnabön. Bi kub niŋe ke niŋöm, gi aij gŋpan aka gi aij gagpan, a ginab. Pen niŋe gi aij ginab me; Bi Kub niŋe ke nŋp gi nö, niŋe aij ginim rö löp.^z

⁵Pen nibi bi rimnap niŋlö, niŋ ap God niŋ kub niŋe rö löp, niŋ ap niŋ yiŋariŋ rö löp. Pen nibi bi rimnap niŋlö, niŋ ap God niŋ kub niŋe rö lagöp, niŋ magöŋhalö niŋ ke ke rö midagöp. Anŋb u, kale ke ke midpim rö, gasi kale aij niŋbim adö anŋbu niŋmim giŋe arnim.^a

⁶Niŋ ap God niŋ kub niŋe rö löp, a göm niŋbal gau, Bi Kub nŋp gasi niŋöm me anig göl gasi niŋbal. Pen nibi bi kaj wal wayöŋ nan gau niŋbal gau, God nŋp aij a göp a göm niŋbal. Nibi bi asi masi gi aij göm, nan rimnap nöp niŋbal gau u rö nöp, God nŋp aij a göp a göm niŋbal.

⁷Hon kamiŋ midun, hon ke halö midpun, a gun gasi u niŋagun. Umnig ginabun u, hon ke halö mudun umnabun, a gun gasi u niŋagun. ⁸Nihön ginig: hon kamiŋ midun, nibi bi Bi Kub hib haglö adö araŋ a gun, gasi u nöp niŋun midnabun. Umnig ginabun u, nibi bi Bi Kub hib haglö adö araŋ a gun, gasi u nöp niŋun umnabun. Anŋb u, mideinabun aka umnabun, hon Bi Kub nibi bi wög gep niŋe midpun.^b ⁹Adö anŋbu nöp, Kraiŋ niŋe umöm uraka. Anŋb u me, hon kamiŋ midpun gau abe, hadö umla gau abe, hon magöŋhalö Bi Kub nibi bi niŋe midpun.

¹⁰Anŋb u, kale nihön ginig añ mam Kraiŋ lau adö midpal rimnap kalŋp, anig gŋpim, anig gŋpim, a gimim manö hag gabim? Pen kale nihön ginig añ mam Kraiŋ lau adö midpal rimnap kalŋp niŋbe, kale nibi bi yiŋariŋ rö löp. Niŋ aij gimim: hon magöŋhalö God amgö ilö adö niŋe u midno, hanŋp manö kub hagnab.^c ¹¹Aisaia God Manö adiŋ ap kali kŋiŋ riköm haga,

“Bi Kub hagöp, ‘Yad niŋö yabiŋ hagabin,
hainö nibi bi gau magöŋhalö yiŋ niŋöm,
nable udöm, kugom yimöm,

“God niŋe añi Bi Kub midöp,” a ginaböl,’ a göp,” a ga.^d

^w 14:1 Ro 15:7 ^x 14:2 Jen 9:3-4 ^y 14:3 Kol 2:16 ^z 14:4 Mad 7:1; Jem 4:11-12

^a 14:5 Gal 4:10-11 ^b 14:8 Gal 2:20 ^c 14:10 2Ko 5:10 ^d 14:11 Ais 45:23; Plp 2:10-11

¹² Anib u, niñim. Hon añi añi midpun rö, God hon magöñhalö hag niñö, hon kamiñ midun nan nihön nihön gipun gau hag ñun, ai ginig anig gipun a gun hagnabun.

Añ mam Krai lau adö midpal rimnap kalip gasi niñmim

¹³ Anib u, añ mam Krai lau adö midpal rimnap kalip, anig gipim, anig gipim, a gimim manö hag gabim u arö gimim. Kale gasi niñmim, yad ginö añ mam Krai lau adö midöp ap dui göm, adan ulham ajep rö u aramöm, lug paköm gi naij ginab, a gimim, agamij midmim, adö anibu nöp gipe arnim. ¹⁴ Bi Kub Jisas bi nipe midpin rö, gasi yad u niñ aij gipin, nan hil gep rimnap midagöp. Nibi bi rimnap gasi kale ke niñöm, nan hil gipal. Pen nan anibu niñno, God niñö aij gagnab a göm hil ginaböl u, nan anibu niñagöl. ^e ¹⁵ Pen kale, añ mam Jisas kalip a göm uma anib gau kalip midmagö lagmim, nan kale asi masi gipal gau haṭöwaṭö ñiñbe, kale gasi iru niñöm ap lug paköl rö löp. Adö anibu gi naij ginabim. ^f ¹⁶ Kale ke niñmim, adö rimnap gimim rö linab u pen nibi bi rimnap anig ginabim u niñöm hagnaböl, “Krais lau adö midpun a gipal u pen kale niñebir nan si nan naij gaböl u me, hon niñbun, Jisas manö aij nipe manö niñ udep a gipal u piral hagnab,” a ginaböl. ¹⁷ Nihön ginig: God nipe kin hon midöp manö adö anibu hageinabun u, nan niñeb ñig niñeb manö anibu hagagnabun; gi aij gep manö adö u nöp hagnabun; agamij hain rik midep manö adö u nöp hagnabun; miñ miñ göl gi midep manö adö u nöp hagnabun. Nan aij anib gau Ana Uṭ nipe ñö udnabun me. ¹⁸ Hon Krai nip niñ udun anig göl geinabun u, God niñö aij ginab; nibi bi gau niñöm, gi aij gipal, a ginaböl.

¹⁹ Hon aigöl gun añ mam aip agamij jim ñöl midun, hon magöñhalö Krai manö aij nipe u niñ ud pidöñ gun, a gimim, adan anibu nöp ktö gimim hain gimim. ^g ²⁰ Nan magö rimnap hil gagep. Pen bi ap gasi gasi löm, nan gau haṭöwaṭö ñiñaiö, Krai nip niñ udöp nibi bi ap niñöm, dui göm, Krai niñ udöp u arö göm ap lug paknab u, bi haṭöwaṭö ñiñnab bi anibu nipe gi naij ginab. Nan magö niñöm, God wög nipe gi naij ginab. Kale anig unbö rö gagmim. ^h ²¹ Anib u, hon niñno añ mam ap lug paknim rö löp, a gi niñnabim u, kaj yuö gau arö gimim, ñig wain gau arö gimim, nan gau arö gimim ginabim u aij. Nihön gino añ mam ap lug paknim rö löp, a gi niñnabim u, añ mam a gimim, anig gagmim.

²² Yad nan niñeb niñagep manö hagpin u, kale nihön gasi niñbim u, kale ke God aip. God hanip gasi aij ñöb rö niñun gun, añ mam rimnap rau ñagnabun u, ñiñi löl gi mideinabun. ²³ Pen nan rimnap gasi miṭö lun niñnabun u, manö mideinab. Nihön ginig: anig geinabun, God nip aij ginim a gi gasi u niñun niñagnabun; nip aij ginim aka aij gagnim a gi

^e 14:14 Ap 10:15; Dai 1:15 ^f 14:15 1Ko 8:11-13 ^g 14:19 Ro 12:18; 15:2 ^h 14:20 1Ko 8:13

gasi u niŋun niŋnabun. Hon aniŋ göl rö haŋowaŋö geinabun u, nan si nan najiŋ ginabun.

Nibi bi rimnap mid aij göl rö adö u nöp niŋun a gimim

15 ¹Hon nibi bi Kraiŋ nip niŋ ud piðöŋ gi midpun gau, hanip ke aij ginab adö u niŋun gagun. ²Nibi bi nip niŋ ud piðöŋ gagpal gau, nip niŋ ud piðöŋ göl a gun, gasi u niŋun gun. Hon ke aij ginab u nan kub wasö; pen nibi bi rimnap, Kraiŋ nip niŋ ud piðöŋ ginaböl aka nip niŋ ud piðöŋ gagnaböl u nan kub.ⁱ ³Kraiŋ u rö nöp, ke aij ga adö u gaga. Kraiŋ nipe Nap nip manö haga rimnap, Depid nipe God Manö adiŋ ap kali kliŋ riköm haga, “Nöp hag jubal u uri yip u rö nöp hag juaböl,” a ga.^j ⁴Kale niŋ aij göl a göm, God nipe geia niŋöm bi nöd nibö gau God Manö u kali kliŋ rikla. God Manö anibu amgö li niŋun, manö aij anibu niŋ udun, Jisas Kraiŋ niŋ ud piðöŋ gun, kŋö gun gi aij gun, agamij niŋi löŋ gi gasi halö mideinabun. Adö anibu nöp God nipe geia, God Manö anibu kali kliŋ rikla.^k ⁵God nipe gö, kale Jisas Kraiŋ niŋ ud piðöŋ gimim, kŋö gimim gi aij gimim, agamij niŋi löŋ gi gasi halö mideinabim. Pen Kraiŋ Jisas ga rö niŋun aniŋ rö gun a gimim, nip aniŋ göl hain gimim, God nipe gö, kale gasi adö aŋi niŋmim, jim nöl midmim, gimim. ⁶Kale aniŋ gimim, gasi aŋi nöp, maj miŋan aŋi adip adip u nöp, Bi Kub hon Jisas Kraiŋ Nap hib nipe u hagpe adö arnim.

God Isrel nibi bi wasö gau kalip u rö nöp mög niŋöb

⁷Gasi niŋ aij gagpe niŋ u, Kraiŋ kalöp mög niŋöm ud aij gö, nibi bi nipe midpim u, kale ke agamij pen pen mög niŋmim, ud aij gimim, midmagö li midpe, nibi bi rimnap niŋöm God hib nipe haglö adö arnab.^l ⁸God hadame nöp Juda kai nihi iŋaŋ kale gau kalip manö kŋö niŋö haga u, haga rö nöp ginab u, niŋöl a göm, Kraiŋ nipe Juda kai kalip nan a göm aua.^m

⁹Anib u, Juda nibi bi wasö gau, God nipe hanip mög yabiŋ niŋöb, a göm hib nipe haglö adö arnim, a göm aua. Kraiŋ nöd Nap God nip manö haga rö, Depid God Manö adiŋ rimnap kali kliŋ riköm haga,

“Anib u, yad Juda nibi bi wasö aŋ gau midem,

kimap hagem, hib ne u hagnö adö arnab,’ a göp,” a ga.ⁿ

¹⁰Manö ap Mosis God Manö adiŋ ap kali kliŋ riköm haga,

“Kale Juda nibi bi wasö gau, God nibi bi nipe aip pa jim niŋmim, miŋ miŋ gimim,” a ga.^o

¹¹Pen manö ap Depid God Manö adiŋ ap kali kliŋ riköm haga,

“Kale Juda nibi bi wasö gau magöŋhalö

Bi Kub hib nipe hagpe adö araŋ.

ⁱ 15:2 1Ko 10:24,33 ^j 15:3 Sam 69:9 ^k 15:4 2Di 3:16 ^l 15:7 Ro 14:1 ^m 15:8 Mad 15:24
ⁿ 15:9 Ap 3:25; Sam 18:49 ^o 15:10 Dud 32:43

Kale nibi bi ram minöŋ ke gau gau magöŋhalö

kimap hagöl gi, hib nipe hagpe adö i gilaŋ araŋ,” a ga.^p

¹²Pen Aisaia u rö nöp God Manö adiŋ ap kali kliŋ riköm haga,

“Bi Jesi rikö rik damöm rik daunaböl ap apöm,

nibi bi ram minöŋ ke ke midpal gau magöŋhalö abad mideinab.

Juda nibi bi wasö gau, Bi anibu nöp gasi niŋöm,

gasi halö mideinaböl,” a ga.^q

¹³God nipe ga u niŋun, gasi halö midpun. God gö, kale nip niŋ ud pidöŋ

gimim, miŋ miŋ göl gi, agamij hibur hain hain göl gi midmim. Aniŋ göl

gi midaibe, Ana Uŋ nipe pidöŋ halö gasi rimid midmagö aŋ kalöp daŋ

apöm gö, kale gasi halö nöp mideinabim.

Pol nihön ginig manö klö hagöm köp kali kliŋ rikaŋ

¹⁴Pen añ mam bi. Gasi yad niŋbin kale nibi bi aij yöl; nagi adö nihön

gimim God nip aij ginab u niŋ aij gipim; kale añ mam kale gau God

Manö aij u pen pen hag ñi aij gimim rö löp. ¹⁵Pen kalöp köp kali kliŋ

rikabin anibi, manö klö rö rimnap hagpin. God yip mög niŋöm, ud aij

göm, wög gep bi nipe hag la u me, yad kalöp manö klö anibu, kauyaŋ

hagnö niŋ aij gim a gem hagpin. ¹⁶God yip hag lö, yad Kraiŋ Jisas wög

gep bi nipe midem, Juda nibi bi wasö gau gi ñem, God manö aij u kalöp

hag ñabin. Yad God manö aij hag ñabin u, yad God nip nan sabe gep bi rö

midem, manö aij nipe hag ñabin. Aniŋ ginö, Juda nibi bi wasö gau, God

nip nan sabe gi ñibal nan aij yabiŋ nan gagöp rö lilö, God nip aij ginab.

Ana Uŋ nipe gö, kale nibi bi ke kamiŋ aij rö lilö, God kalip ñiŋi löm

udnab.^r

¹⁷Kraiŋ Jisas aip jim ñöl midpin u me, yip aij gö niŋöl gi, God nip wög

gi midpin. ¹⁸⁻¹⁹Kraiŋ geia yad nip wög gem, yad wög nihön nihön gipin

u nöp hagnabin. Yad Juda nibi bi wasö gau kalip Kraiŋ manö aij u hag

ñi ajaŋnö niŋöl gi, Ana nan gagep rö rimnap gö niŋöl gi, Juda nibi bi

wasö gau niŋöm, God manö u udpal. Yad ram minöŋ Jerusalem urakem,

Kraiŋ manö aij u magöŋhalö kabö göl nöp adan milö yabiŋ hag ñi aij gi

dam dam ram minöŋ Ilirikam amem, ado gi aunö. ²⁰Gasi yad pör niŋbin

u, nibi bi Kraiŋ manö nipe nöd niŋagla ram minöŋ gau nöp amem, hag

ñinam a gem niŋbin. Bi Kraiŋ manö hag ñeb rimnap nöd amöm padö

biŋiŋ gila adö u ram ginam a gem niŋagpin.^s ²¹Aisaia nipe God Manö

adiŋ ap kali kliŋ riköm haga,

“Kalip manö aij nipe hag ñagal;

pen kale niŋnaböl.W

Nibi bi manö aij nipe apdi niŋagal gau,

^p 15:11 Sam 117:1 ^q 15:12 Ais 11:10 Rep 5:5 ^r 15:16 Ro 1:5; 11:13 ^s 15:20 2Ko 10:15-16

kale niŋöm niŋ aij ġinaböl,” a ga.^t

Pol daun kub Rom arnam, a ga

22-23 Anib u, mi iru yabił nöp, ram minöŋ gai i hag ñi aj aj, daun kub kale Rom arnam a ġimidin u pen ninam rö laga. Pen miñi ram minöŋ riġon ġai i wög ġinam rö lagöp niŋem yad kalöp niŋniġ ninabin.^u 24 Yöp söl midöp, ram minöŋ Spen arniġ ġabin. ġasi yad niŋbin u, am kale aip pro magö ap midnö aij gö niŋöl ġi, hainö yip dam Spen adan ramö u yumim, a ġi ġasi niŋbin. 25-26 Pen Masedonia Propins nibi bi abe, Akaia Propins nibi bi abe, Jerusalem nibi bi Krai lau adö midöm mani nan kale midagöp gau, kalip mani nan kale gau abönamö ñila u, miñi kalip ñinam a ġem ninabin.^v 27 ġasi kale ke niŋöm ġipal anibu, ġi aij ġipal. Juda nibi bi Krai manö aij u dam, Juda nibi bi wasö gau kalip hag ñibal rö, ġod mani nan kalip ñöb gau rimnap Juda nibi bi kalip pen ñinaböl u aij.^w

28 Pen mani yip ñibal anibu magöŋhalö dam Jerusalem bi gau ñem, Spen adan u amem, kale midpim u ninabin. 29 Ñin anibu apem kalöp niŋnö, Krai ġasi aij nipe nö, kale nip niŋ ud sisi limim ñiñi yabił linabim.^x

30 Añ mam yad gau. Bi Kub Jišas Krai lau adö midpim u, ġod Ana aŋ kalöp daŋ midöm kalöp midmagö lep magö u ñab rö, yad a ġimim, ġod nip sabe ġöl ġi nöp midaimim.^y 31 ġod nip sabe ġi midaimim, yad Jerusalem arniġ ġem, ram minöŋ Judia areinam, Judia nibi bi Krai nip niŋ udagpal gau yip ġi naiġ ġaiöl, yip ud kamiŋ yunim. Pen ġod nip sabe ġi midaimim, yad Jerusalem amjakem, Krai nibi bi nipe gau kalip nan niñön niñön ġi ñiniġ ġabin u ġinö, kalip aij gö niŋöl ġi, aip ġim ñöl midaiun. 32 Anib u, ġod yip yau a ġainim, kale midpim u amem, magö ap midnö aij gö niŋöl ġi, kalöp aip mideinabun.

33 ġod kalöp magöŋhalö abad midö niŋöl ġi, aġamij ġim ñöl midmim mid aij ġimim. Anib unbö rö aij.

Pol, “Kale midpim?” a ga

16 ¹Pen añ hon Pibi, Senkria daun au cöc wög ġab nibi u, nab. Nipe nibi aij yabił. Kale midpim u amjakö, nip ud aij ġimim. ²Yip aij ġinab u, kale midpim u amjakö, kale Bi Kub niŋ udpim rö, Bi Kub nibi bi nipe pen pen ud aij ġipal u rö, nip ud aij ġimim. Nan rimnap midagainim, hałowałö ñimim. Nipe nibi bi gau iru nöp kalip ud aij ġöm, yip abe ud aij ġöm ġöp.

³Pen nibi Prisila abe, nugmul Akwila abe, Krai nip wög ġim ñun ġimidun ber miñau kalip haġmim, “Pol kalöp ber miñöŋ, ‘Midpil?’

^t 15:21 Ais 52:15 ^u 15:22-23 Ro 1:13 ^v 15:25-26 1Ko 16:1-4; 2Ko 8:1; 9:2,12; Ap 24:17

^w 15:27 1Ko 9:11 ^x 15:29 Ro 1:11 ^y 15:30 2Ko 1:11; Kol 4:3; 2De 3:1

- a göp,” a gîmim.^z 4 Nöd yip al pak linig geila, ber aij yad mihau midmil, yip amdam gilö. Pen halpe ke al pak löl a gimil gasi u niñagmil anig gilö, yip aij göm, Juda nîbi bi wasö ram minönj ke milö gau hag ñinö Krai Jisas niñ udpal gau kalip abe aij göm göp.
- 5 Pen nîbi bi Krai Jisas niñ udpal ram kalip ber u magum gîpal gau kalip u rö nöp hagmim, “Pol kalöp, ‘Midpim?’ a göp,” a gîmim. Mam midmagö yad Epinidas nip hagmim, “Pol nöp, ‘Midpan?’ a göp,” a gîmim. Esia Propins au, Krai nip nöd uda bi me anîbu.
- 6 Nîbi Maria kalöp klö yabił wög gi ñimidöp u nip hagmim, “Pol nöp, ‘Midpan?’ a göp,” a gîmim.
- 7 Pen bi ridik yad niñeb rö, Adronaikas abe, Junias abe, kalip mihöñ hagmim, “Pol kalöp mihöñ, ‘Midpil?’ a göp,” a gîmim. Kalpe mihöñ Krai nip nöd niñ udlö, yad hainö niñ udnö. Yip nagi lila rö, kalip mihöñ u rö nöp nagi lilö, jim ñun midmidun. Pen bi Jisas manö ud arep gau, bi anîb mihau kalip niñ aij yabił gîpal.
- 8 Mam midmagö yad Ampliedas, Krai nip cig aij göp u, nip hagmim, “Pol nöp, ‘Midpan?’ a göp,” a gîmim.
- 9 Mam Urbanis nip hagmim, “Pol nöp, ‘Midpan?’ a göp,” a gîmim. Mam anîbu yad aip Krai nip wög jim ñöl gimidul. Mam aij Sidakis nip u rö nöp hagmim, “Pol nöp, ‘Midpan?’ a göp,” a gîmim.
- 10 Apeles, marö auö, Krai nip niñ ud pidönj göm mid aij göp bi u, nip hagmim, “Pol nöp, ‘Midpan?’ a göp,” a gîmim.
- Nîbi bi Arisdobiulas ram midpal gau kalip hagmim, “Pol kalöp, ‘Midpim?’ a göp,” a gîmim.
- 11 Bi ridik yad niñeb Herodion nip hagmim, “Pol nöp, ‘Midpan?’ a göp,” a gîmim.
- Nîbi bi Nasisas ram u midöm, Bi Kub niñ udpal gau kalip hagmim, “Pol kalöp, ‘Midpim?’ a göp,” a gîmim.
- 12 Nîbi Draipina abe Draiposa abe, Bi Kub nip niñ udöl gi, nip wög gîpil nîbi anîb mihau kalip hagmim, “Pol kalöp mihöñ, ‘Midpil?’ a göp,” a gîmim.
- Añ aij yad Persis, Bi Kub nip niñ udöl gi, nip wög klö göp nîbi anîbu nip u rö nöp, “Pol nöp, ‘Midpan?’ a göp,” a gîmim.
- 13 Bi Rupas, Krai nip wög klö göm göp u, nip hagmim, “Pol nöp, ‘Midpan?’ a göp,” a gîmim. Nîme nîpe u, ami yad rö löp u, nip u rö nöp hagmim, “Pol nöp, ‘Midpan?’ a göp,” a gîmim.^a
- 14 Asinkridas, Pligon, Hermes, Padrobas, Hermas, nîmam kale aip midpal gau abe magöñhalö kalip, “Pol kalöp, ‘Midpim?’ a göp,” a gîmim.

^z 16:3 Ap 18:2 ^a 16:13 Mak 15:21

¹⁵Pilologas, Julia, Nereus, Nereus niñin nipe Olimpás, Kraís nibi bi nipe kale aip midpal gau magõñhalõ, “Pol kalõp, ‘Midpim?’ a gõp,” a gimim.

¹⁶Kale Bi Kub nip niñ udpim rõ, pen pen hag wihai udõl gi, alaun bom halumim.

Kraís nibi bi nipe gai i God nip sabe ginig cõc ke ke magum gipal gau, “Kale midpim?” a gipal.^b

Manõ piral haggal gau udagmim

¹⁷Añ mam aij yad gau, niñ aij gimim. Nibi bi rimnap manõ gau nibõ gau nibõ dapõm, nibi bi Kraís lau adõ midpal gau kalip hag ñilõ ñilõ, gasi aij nõd niñla adõ u arõ gõm, manõ piral haggal anibu udõm, asik ke ke libal. Kalõp anib unbõ rõ nõp ginim rõ lõp u, manõ piral hagaiõl u udagmim.^c ¹⁸Nibi bi anig gipal gau, Bi Kub hon Kraís nip wõg u gun, a gõm gasi u niñõm gaggal; kalip ke aij gõp adõ u nõp gasi niñõm gipal. Kale manõ hain hain rõ, nibi bi hib dap raneb manõ u nõp hag hag gi midlõ niñõl gi, nibi bi niñ aij gaggal gau manõ piral kale niñ udõm dui gipal.^d ¹⁹Kale pen God manõ aij u ud aij gimim, hagõp rõ gimidim, nibi bi gau magõñhalõ niñbal u, yip aij yabiñ gõp. Nan niñõn God amgõ ilõ nipe aij ginim u, kale nibi bi gasi niñeb rõ midmim, nan niñõn God amgõ ilõ nipe nan si nan naji rõ midnim u, kale nibi bi gasi hauñ rõ midmim u, yip aij ginab.^e

²⁰Sõl midõp, God nibi bi abad mid aij gõp u, nipe Seden nip ud rañ mo kale gau lõ, klõ nipe midageinab.

Yad God nip sabe gabin, Bi Kub hon Jisas kalõp mõg niñõm ud aij gõ niñõl gi, kale mid aij gimim.^f

²¹Bi yad aip wõg jim ñõl gipul, Dimodi, kalõp hagab, “Midpim?” a gab. Bi ridik niñeb yad gau Lusias, Jeson, Sosipada u rõ nõp kalõp, “Midpim?” a gabõl.^g

²²Pen yad bi Dedias, Pol hagõ kõp kali kliñ rikabin i, u rõ nõp kale Rom kai Kraís lau adõ midpim gau kalõp, “Midpim?” a gabin.

²³Bi Gaias, yip Pol dam ram nipe u lõm, abad mid aij gõp u, kalõp, “Midpim?” a gab. Bi anibu nõp Kraís lau adõ midpal nibi bi gau hagõ, ram nipe u amõm magum gipal, kalip ud aij gi midõp.

Pen bi kuskus pe ñeb Erasdas abe, mam hon Kwodas abe, u rõ nõp kalõp, “Midpim?” a gabil.^h

²⁴Yad God nip sabe gabin, Bi Kub hon Jisas Kraís kalõp magõñhalõ mõg niñõm ud aij gõ niñõl gi, kale mid aij gimim. Anib unbõ rõ aij!

^b 16:16 1Ko 16:20; 1Pi 5:14 ^c 16:17 Mad 7:15; Dai 3:10 ^d 16:18 Plp 3:19; 2Pi 2:3 ^e 16:19 Ro 1:8; 1Ko 14:20 ^f 16:20 Jen 3:15 ^g 16:21 Ap 16:1-2; 19:22; 20:4 ^h 16:23 Ap 19:9; 1Ko 1:14

²⁵⁻²⁶Pen God hib nipe hagno adö arnim. Nipe nöp me kalöp abad midö niñöl gi, nip cig aij gimim midmim rö löp. Jisas manö aij anibu nöd pi göl midmidöp u pen miñi, bi God manö hagep gau, manö nipe God Manö kalı kñiñ rikla u waiö lö, manö aij anibu nibi bi gau kalip pör hag ñibin. God nöp hagö me, nibi bi ram minöŋ ke gau gau magöŋhalö hag ñino, nip niñ udöm hagöp rö göl.ⁱ

²⁷God añi gasi aij gasi klö göm niñöb u, Jisas Krais nip hanip nan a göm yuö aua rö, hib nipe pör nöp pör nöp hagno adö araŋ. Anib unbö rö aij me.

ⁱ 16:25-26 Ep 1:9; 3:5,9; Kol 1:26; Ro 1:5